

寓

林

集

寓林集卷之六

武林黃汝亨貞父著

序

壽鮑翁八十序

予始來白門鮑生良思以弟子見甚得也久之生言
父松亭翁雖起家服賈好與賢長者游願望見先生
予倒屣迎之意其年七十上下耳而目光炯炯射人
衣冠甚偉登降有度儼然儒紳也問其官則隆慶改
元之歲以貲爲郎將五十年矣予戲以爲莫非王臣

而翁尤舊德真我願從遊於是過翁飲酒宴笑爲賦
松亭之什而翁父子亦甚宜予之樂易也問翁年則
明年七月翁已開第八袞矣良思之友某某輩欲得
予文爲壽而又慮予官滿將去遂預以請予曰固也
微諸君請予亦願有言也夫松亭翁其先窶人子耳
擔囊握筭服牛馭馬奔走吳楚揚粵之郊不十年富
埒封君身膺王爵訓子孫而潤色之而又能治其威
儀以自達於公卿翁豈猶夫人者哉嘗取所謂松亭
集者而披之自相國冢宰而下其間乘旄仗鉞之吏

天子文學侍從之臣下逮山林孝秀莫不爭爲詞章以頌翁之德此豈一人之私而又豈每人而悅之者蓋翁之行諒足以資文林之藻績而翁之精神固能浹驩於士大夫間也頃翁復爲予置酒賓主相對時默察翁見其骨稜稜而神奕奕目光炯炯如昨酒闌樂撤予有倦色而翁復手觴獻酬因敘少年遊歷及今時食飲起居狀蓋牙籌不休而室有姬侍予大笑引滿嗟乎此非期頤之徵也歟譬之松焉有踈於足者有拔於手者有斤斧於拱握者有幽崖絕谷而終

其天年者亦有名山孔道車馬之所蔭蔽鶴鶴之所棲鳴高人韻客盤桓嘯咏其下殆無虛晷而蒼然玉立卒莫有害蓋千尋之榦其非手足斤斧之能侵也明矣敢以爲翁壽若夫翁之好行其德與其他大節已略見於諸公長者之文而予於翁父子游最習翁伯仲子已五六十長者兄弟輩稱觴怡顏樂當無涯而尤喜翁少子良思之能友于以聚順也遂以所覩記者頌焉

黃翁七十壽序

太史公有言君子富好行其德小人富以適其力世
之所謂富人者我知之矣蘭膏明燭酣歌恒舞呼盧
叫梟役貧使氣務快意而止而孝友以爲政慈儉不
先以爲寶一切漫漶不問及觀計研之徒范少伯三
致千金悉散與貧交疏屬太史公傳之爲貨殖首而
他書稱二人仙去不歎乎此非適力行德之分歟
光祿寺署丞黃公新安門人如鶴父而吳懷謙元益
之姻家翁也九歲而孤稍長孝養其母念儒効薄無
以供七箸與其伯仲迭出治鹽於真真江淮都會豪

猗萃淵藪日旰晷孺子公慤而肅待以誠壹毋敢動
比冠析著居巢間審時善任人業愈起一日歸爲母
壽曰兒不孝有四方役不長娛膝下今菽水幸給願
推其羸使羣從鄉閭漑母澤母喜曰卽此是孝矣於
是自親罽疎或饗殮以養其老或衣食以俟其壯賈
者假貸之讀者資給之谿爲之成津梁溝爲之掩齒
豁人有頌公者輒曰此老母志也旣而母夫人以壽
考終堂冬月寔雪蔽途不辯牛馬臨祖俟霽人以爲
行德報而公益鼓舞不倦浸漬濃郁邦君聞其風而

高之請賓鄉蜡謝不敢當邦君益重公固請以往頃以恩例得官曰我孤兒也而黃髮我庶人也而銀青涯分以踰不可更自豐殖盡謝其事而日攜諸孫婆娑亭圃彊飯養恬已矣夫公固素封力足以自適而問所奉養則室無季女厨無衆殺施無絲縞然則公之自幼至老爭時鬪智以坐收廉賈之美者凡以爲行德地而非他貨殖私其身者比其計研范蠡之流歟公今十月七十春秋矣且有子如鶴廩學宮貯學績文他日必脫穎出而內外曾孫凡三十餘人必多

滋蘭樹玉之秀以貽翁百年者又翁爲魏郡太守香之裔香九歲失恃性至孝而香子瓊瓌孫琬相繼馳聲漢世翁餘慶或當與之類予故併論次之以授吳君元益進而頌岡陵侑壽羊焉

壽詢法師五表序

某不慧無文則未敢輕談道妙亦自幸夙有微緣少時見先慈嚴老而敬事佛齋誦不輟脈脈有動年十九與劉抑之讀書聖水寺偶與葦航法師會宣說楞嚴雅好之又好靜息默坐坐起卽清談丙夜不休廿

餘年來流墮諸趣浮沉于書生俗吏之務聖水之意
幾不爲我有詢禪師有華嚴徑去余家不遠亦少良
晤曾一面之語溪經席則心識之迨予自鍾陵還家
課兒讀書其林而乃旦夕與師周旋聖水之意恍惚
復來乃知師性妙樸質見地沉朗不與今之法師馳
騁于語言文字而悍然于捧喝侮智欺癡愚者比庶
幾乎吾儒闢然之光佛子真實之義矣師今行年五
十修證不倦固其根器自來抑何所受授而臻斯境
問之乃系出山陰任氏之族十九從雲樵大師受記

剝落二十外卽遺形骸歷寒暑涉牛山少室諸名勝
遍訪知識探正法眼而歸復從雪浪師日究羣經夜
參禪寂嗟乎本雲棲之真修通之以雪浪之實解宐
其沈朗映徹能澄然照人卽以予之不慧而能提予
聖水之初意津津乎可會而不可竟他可知也師學
行詣實不欲以名號動人爲海內傾渴者所仰迫而
應之年三十六方振揚宗風自吳門訖今所歷道場
已饒三十餘會每一設席幾千餘人旣智海而潤玄
津者無算總之皆從心開義誥無妄發發無倦施故

也衆義俱曉于法華楞嚴尤得衣中之珠學者罕得
而窺焉獨涉獵佳山水境與意會必有題咏有如啖
蔗必入佳處人或疑其務外師笑曰正謂本心除妄
耳何外之有嗚呼斯之爲妙果不可以華實內外判
也非師亦惡能臻斯境也哉易有之過此以往未之
或知以師之實修實證五十以後其所詣真實玄妙
不知當何所止息某卽不慧倘謝塵鞅而歸休乎林
間老不厭學華嚴經中與聖水參會師是時當必有
笑而頷我者卽以斯文爲印而與師諸弟子宣讚無

壽考身 卷之六
量壽從前講解又當付之恒沙億萬也師弟子大琳
廣嘗等聞斯語俱合掌前請曰此時且乞明公施此
語爲吾師無量之初祝

壽劉母羅太夫人七十序

宮諭劉雲嶠先生起金門玉管之業文學侍從稱天
子私人日就隆貴其爲凝鼎阿衡之日不遠天下固
以爲先生必以天子之私私所親日飫于大官之珍
饒法醞而霞帔雲冠需用于五章之服以極寵一世
者爲尊養而先生之于母夫人獨不然當其入中秘

擁板輿而俱也瑯筍之殿左右晨昏固日以母夫人也壬辰之春坐未暖席請于上擁板輿而歸則又曰以母夫人也已一再強起副主上眷注出簡入闕之材以棟宇清廟入雍容儲邸論說經幄沃乃心納誨稱至近重臣人以爲先生固安之而某時上春官趨京師得以故人見因見先生朝天子出而攢眉若且誦天王聖明也者而不能無軫當世之慮朝太夫人出而解頤若幸然曰有母氏之聖善在于是乎抗疏論天下事未幾又復請于上擁板輿而歸

則又曰以母夫人也先生抵家無幾時某以鍾陵令至鍾陵去先生家數十里而近先生固嚴重不輕與郡縣吏通某亦不敢以鍾陵令見顧猶得徼故人驩晤于玉嶺山之館坐語移日因敬問太夫人無恙則先生爲鞞然笑曰幸甚健七是季夏七之日爲七十春秋矣某亦爲鞞然引觴者三問何以爲太夫人壽則先生笑不答某于是離席前先生言曰人情固有割大官餽去尚方之珍饈法饌而甘園疏野菽若飴者乎充珈重珮鶴繡象服不以爲適而適布被襟袖

者乎進而朝堂三公九列以下置牛酒相勞吹竽擊
鐘萃海內能言詞之士詠南山歌未央不以窮人世
之極榮而欣然與宗族子姓閭里之衣冠杯棬而相
盤辟周旋爲愉快者乎若此者丈夫之所難也而太
夫人易之 主上方嚮用師傅之臣曰惟鹽梅舟楫
是賴無金鬻堂陛之嫌朝紳綵菜衣鼎食參養無靡
鹽尸饗之嘆而先生若有所愴然以去而愉然以返
未嘗斯須釋治世明主之戴而恒以戀戀膝下爲驩
若此者丈夫子之所難也而先生易之然則先生所

以壽太夫人者易言哉古之爲人母者若嚴雋陶三母之著其子于名也不兼節也其爲人子者捧檄而喜以養其外介山之攜而俱隱以養其內也似也烏有進而匡主退而將母中有所獨至而母子之間融融泄泄兩相恬愉于志意之表而不以告人者若先生所以事太夫人與太夫人所安于先生其引日將月寧有量乎異日者卽鼎鉉阿衡以爲大業而光祿視膳尚璽視寶中秘視詞以爲太夫人千秋彼太夫人所以爲千秋者不在也先生于是輟然起謝曰以

子之善頌也而不敢當亦以子之善頌也庶幾解予
田間之適以代五鼎其于是忘其俗吏之賤退而授
之副墨登之太史之堂申頌禱焉太夫人他懿行及
讀書曉大義通古女史有謝王夫人之風其誼戚有
道之者不具論

許母吳恭人七十壽序

今人子所致於親與親朋之爲人母也莫不有文辭
玄黃之飾稱觴上壽動相矜詡以爲固然然婦德不
外著考其所稱述惟米鹽絲菜筦籥之能或督臧獲

婢媵拮据蚤夜而已其上則戒衿縷修腰臘俎豆燕
饗而已乃若道義隆推讓智略經世務廉節敦風範
則鬚眉丈夫之所難而余得之許恭人恭人許中丞
華峰公之繼配也中丞之封翁覲峰公家素饒恭人
以中丞公業已祿食安得復議析箸請悉捐其貲推
之伯季不有一錢中丞公初令閩時海寇猖獗屢切
師徒沿海諸邑波濤不靖冬造戰艘而閩首事匠匱
艘形以進恭人見而驚曰此艘底淺簷深於法當敗
乃出新意改其式後各邑艘果皆債而閩獨完昔豈

夫人登襄陽城謂西北角當先受敵於角斜築新城襄陽賴此得完人以爲夫人城此亦可名夫人舟也中丞以治軍旅歿於貴陽左右具言例得檄所屬貯嘉肺之入爲橐中裝恭人按藉計可三千金而羨立却之遂彙朋送三司以成中丞之廉諸縉紳聞見者相傳頌以爲美談此與李審諸母不受御史臺所贖祿米及還脚車錢者何異然則米鹽拮据與閩閩中饋之能世人所兢稱以爲壽者恭人不與之爭也而鬚眉丈夫所高義讓智略風節之事恭人勿遜也然

則烹鮮割肥吹竽鼓鐘珈珮尊榮之飾不足以增恭
人之德色而人世所稱壽類迂豔其辭希心不可有
之事非金母之桃則佛母之蓮年則長生壽則無量
孰與吾恭人皈佛而不至梵剎通佛理而不佞佛事
如閩邑之艘全閩生靈是長生之術也却金以成中
丞公廉而燕翼其子彊學力行登孝廉之船名位未
艾是無量壽也以此而稱不朽觴千秋比世所羨耄
耄期頤者不猶朝槿夕菌之與喬松大椿乎哉恭人
七十縣悅之辰爲冬十月恭人之子孝廉君將以秋

深上公車予子茂榛爲孝廉君子壻於禮當爲大母
壽而不敢以世俗之文進也以此正語實義登孝廉
君之堂孝廉君再拜引爵誦予文以爲恭人侑

壽方母鄭孺人八表序

王介甫有言祿與位庸人鄙夫之所恃以爲榮也賢
者道弼於中而祿之以藝無祿與位以爲父母榮而
父母亦喜無量夫父母之欲其子之貴也甚於其身
之壽故顯親揚名仲尼亟取焉而論大孝者亦有徵
於祿位聖人之經炳若丹青介甫曾不聞乎聞之而

故爲高論以舛馳相背亂介甫雖拘當不敢也豈經
所論以勗孝子而介甫之言則賢父母之心若此乎
吾友職方氏方君孟旋道弼而藝祿海內莫不聞老
于書生者三十年而其母鄭太夫人忘乎貧且賤也
及孟旋成進士登朝蒞官分司雷鑰之重太夫人春
秋八十疊服象揅以就大官共養而澹然泊然視其
子猶書生而自視猶書生之母也夫書生之母與太
夫人相去遠矣而太夫人一之是不以貴賤貳也不
以貧賤貳者不以天壽貳者也然則過此以往雖閭

期願歷千秋其自視也與嬰稚何貳而況今日者八
表之始開乎嗟夫此孟旋之所謂人貌天行無懷葛
天之民者矣壽莫壽于無懷葛天孟旋之所以願其
母至矣哉夫賢父母固不以祿位易子之道藝然以
孟旋之道藝而祿與位又偕壽母之春秋以方來如
日升而川至吾又以知孟旋之言不勝乞學士大夫
頌禱之辭不勝摘殆將脫脫筆禿而莫殫其形容也
予與孟旋同臭味先後起貧賤羨孟旋板輿之樂而
竊深陟屺之思故反覆于祿位以褒孝子而娛壽母

且喜孟旋能以聖人之道孝其親而不徒退托于介甫之言以自安也聞太夫人神明清湛年雖高猶日率羣婢妾作女紅至篝火不已或隱間穿繡針此其壽徵真未可量者無俟予言乃若神之凝而德之至卽以孟旋視無形聽無聲求其髣髴者不可謂不微猶自謂若醉若飶而旨與味終名言之而莫克舉而鄙人又何足以窺之

羅母馮孺人六表壽序

予與玄父周旋久卽一日別亦未嘗去于懷是役也

予微天幸而玄父乃敝裘以歸予固刺刺不能已而
玄父故湛靜庶幾聞道者亦若有抑鬱不展之色問
之則又不獨以去予左右也曰大冠之母及今而六
十春秋矣不以此時竊升斗而以綵衣歸舞也問母
縣悅之日則爲孟夏三之日趣行猶可及千秋而觴
也于是玄父爲洒然色愉而予亦爲玄父喜且自悲
也曰與第而嘆不逮與逮而以遲一第易孰愉者乎
于是玄父喜而躍馬若忘其去我者而予卽促促不
能文不可無以爲母壽且以予之壽母也而文也與

哉蓋習聞母之賢彤管不勝書方母偕野亭公事翁
伴山公也家故貧伴山公善飲母恒減半菽以給五
斗蓋竟翁世而靡所不承其驩心伴山翁老而呼孝
婦非吾婦吾女也野亭公治家嚴母承以寬野亭公
起家人務嗇母承以施野亭公氣岸疎宥母承以密
蓋帷簿之內有莊師友焉長君重卿及玄父服儒而
儒行玄父且以儒售仲叔服賈而賈貯且以賈之門
而仁義存母顧復教訓無儒賈一也繇是以觀孝莊
慈母三善備矣卽諸子敝衣而疏食母之所爲六年

與日月遠者固在而且玄父積學力行懷忠信待舉其為豐年在也夫逮而以遲一第易玄父且愉况第而猶逮有此日月也融融洩洩寧有既乎小人有母未嘗君之羹予固不能不干玄父之別縈歎太息而羨玄父之有此歸也豐多故親寡旅予即幸而第不知所遭際建豎與玄父奚若玄父行矣余即不文請為頌南山崗陵之章以遙為母祝而予所食母德未報者亦不勝書焉

吳母程孺人七十壽序

中翰吳子敬之母程孺人以甲寅七十春秋吳子預
徵言于黃子皇皇焉惟是一命之未將而將片言代
五鼎黃子謝不敏以語吳子曰夫年壽亦生人所時
有也要期于至貴至貴國爵屏焉壽莫上焉夫簪纓
冠佩之爲貴也國爵也道德有于身仁義腴于聞教
化行于子孫而型范世世此所謂至貴士君子之所
服也令婦人而服士君子之行闔閭而立型范斯其
爲貴也至矣爲年也大矣奚一命之榮而片言之侈
吳子聞之爲避席頓首曰此吾母之素也小子敬圖

于所見蘄以世貴貴吾母聞子之言而爽然失也吾
實有所自貴敬不敢隱爲吾子誦言之母望南公之
最愛女也慧而莊有遠識當望南公收雲間息而里
居盜燬其廬公不憚母年尚少百方以義命爲解公
益奇之長而歸家大人相敬如賓所以事大父龍泉
公大母黃孺人極恭順亦會有盜夜分至家人但踉
蹌匿背重走母曰委之惟兩尊人是護家幸比素封
之入母益躬爲節齋勞苦中饋女紅皆手出口曰爲吳
家母實難不如是無以爲諸婦鑒至賑窮急宏利益

事仁施義予往往輔家大人行一無所拂親黨貧而待以舉火者若干家視一姊四姑最周而尤憐恤其寡婦待庶子如已出遇臧獲輩咸有恩紀晚年禮佛然跡不越閭以外不近六姑喜布施不標姓氏居嘗語不肖兄弟輩曰先世好學爾母情先世好客爾母慢先世好施爾母愆不肖輩守茲三好日廩廩母氏之訓罔敢失墜而隱約閭巷無顯融之業以邀一命爲是恧然而懼今吾子所稱躬道德腴仁義教化行子孫而型范在閨闈至貴而屏國爵吾母似庶幾近

之雖然人子而腴其親不信也信而無當世文人之筆以徵美來茲不傳也吾子其幸許之黃子聞而色喜乃改容起拜曰有是哉母之能有可貴而自爲壽也吳子之能以至貴貴其母也抑有感于古先王之養其老也饋漿而酌爵割牲而總于皆其天子冕而親之厥禮至隆備惟婦人不得蒙其澤計古之賢人君子而爲婦人女子者嘗十一于男子而禮數爲限先王弗能強也是以聖賢筆削之權重于天下筆其命于天者以申王命之弗逮故立言君子能貴其德

行而耀其幽潛惟夫世之文人以諛言溢美而交失焉洵若吾子之母予卽薦蕪辭而侑卮葦後之君子考誌林于千古庶幾徵文考信而曰是吳子之母也母之有吳子也斯其爲母壽也又奚俟簪纓冠佩之爲貴然後侈當世而永千秋哉

吳母程節婦五十壽序

節之名不知始何代若耳目所覩記莫先於文王之係詞其詞曰節亨苦節不可貞何哉及孔子出讀之韋編三絕而始曉其故喟然嘆曰其道窮也蓋孔子

之意物不可終窮臣節窮而九廟之靈餒婦節窮而
二姓之澤枯其道固如此也是故伯魚歿當是時其
妻之年不減四十矣又有汲爲之子孔子爲之舅可
無饑寒之憂卒嫁於衛孔子不禁也然則聖人未嘗
以節強其家而敢以苦節訓萬世乎故其剛詩上自
商契下迄陳靈公千有餘載又合十五國之風而所
取一人栢舟之詩是也孔子以爲如是足矣及世下
衰惟恐不信於人始好爲奇危激烈之行嗟乎譬之
松與栢焉使剗削于萌蘖尺寸之時則所謂冰霜之

操參天地之勢孰從而驗之吾是以有取於吳母程孺人也孺人生長富貴父祖俱鄉進士歸吉甫君甫四歲而寡年僅二十有一今年五十耳稱未亾者已二十九年於茲長齋事佛兼通佛理以自淑其性行而勉旃二子曰昌祚曰昌齡綴文修行漸有聞於時使二十九年之前不勝惛忿以窮其道吾意此呱呱者生歿且莫保而况於卓有成立也哉夫道窮則無所復之不至於窮何往而不可吾見自今以往子嬌翰翮而母榮翟翬寒暑晝夜數變易乎前而松與栢

蒼然未有艾安之享甘之吉其道固如此也昔孔子
不輕譽人然莒人之妻泰山之老婦一言一行爲弟
子誦說之不倦又况弟子之母乎今孺人二子皆從
予遊而孺人膏沐永捐眉壽方始深有合於栢舟之
靡慝予固自孔氏者安能嘿嘿乎季春二日爲孺人
五十初度於是論序之以貽二子使附頌禱之末焉

方母鄭孺人六十壽序

古之盛王未有遺年者也然深衣素衣執爵執醕王
制詳言之未有及婦人者至魯僖公而壽母之頌始

見于詩豈女子之年壽固不及男子歟抑善懷無極所以戢戢其天和者至歟含德弘慈永有令範吾獨得之方母鄭孺人孺人出洪橋鄭氏爲新安名族大參公羣從之子性俊慧精研女紅孝經列女傳諸書亾不通曉年十四歸方君世叔爲能備色養奉尊嫜督閭內之政旁及家人產佐夫子所不及而最難者世叔廓落好施予敦族賑窮孺人翼而行世叔善交遊天下士解佩盍簪孺人無所惜世叔沒而縞帶食蔬家政儉肅斯其爲懿美已非世俗所有而其子如

駢以孺人六十春秋來乞文侑觴猶以爲非其至者
其言曰母孺人如駢之嫡也兄如驛母所出也少之
時水火燥濕無不均也菓餌嬉戲之物無不均也疾
病而呵護至束髮從師弱冠婚娶無不均也其子七
兮其儕一兮吾母之謂也吾鄉俗靡而易蕩母患之
曰聞大江以西朴茂有淳古風盍往觀焉則兄先而
弟亦從也二子篝火夜讀母必坐側問所讀何書策
以令名不論兄與弟也吾兄知母不如如駢之深如
駢敢再拜以請予聞之喟然而嘆曰是穆木鳴鳩之

匹也可以頌壽母矣雖然文王十子皆太姒所出而
鳴鳩之所咏亦未聞有嫡庶之別雖古之聖善未易
比絜而以予眉睫之論孺人爲又難矣後漢明德舍
鉛弄孫彼無子而能子人之子史策已爲美談又况
已實有子而能一視者乎葛藟荒之而福履不將吾
不信也二子俱美秀能文令名方來壽母之頌將有
繼魯僖而歌詠其事者予唯論著其大者以侑萬年
之觴焉

汪母方孺人七十壽序

新安有叢睦汪氏巖鎮方氏兩家稱鼎族多衣冠禮樂之彥余嘗覽汪司馬所爲孝廉公傳其人敦說道義明經修行稱長者竊謂必有閨閣賢者爲之佐三從孝廉公子穆溟昆季輩論交已叔子元禮與其姪若士從余游湖山俱金相玉質斌斌好修振箕裘之業又意其必有賢母義方以代有終乃今而稔孝廉公之高與諸子之嗣服好修果方孺人以也孝廉公少失恃且會家艱母胡嚙嚙在堂未易事孺人自筭歸卽能食茶茹辛以相孝廉公奮筆下帷而入以事

姑惟謹愉愉如也孺人舉四丈夫子與一女而五俱躬自提抱偶翁璋同時臥病牀第間孺人日夜不解帶爲稱水量藥而以間竊身視子若女不啻德也丙子孝廉公射策而遺意憤惋無復入試望又以貧安所得道里費孺人陰以簪裾易貴迫促就道而孝廉公遂舉矣孝廉公斤斤自閑自言如處子之秘公宮而性喜客則孺人薦羞好行有義事贍宗族交游不給則孺人脫簪珥佐之性方嚴繩諸子婦自幼而長凜于朝典里婦有違言得孺人片語不啻著祭而比

閩多豐豪統綺之室魚軒鱗次孺人至則肅然同母
弟四人俱任俠仗義聲四方事孺人如母亾敢以厯
行狎者生平爲善不佞佛晚而皈依齋素磨礪身意
非爲福田利益也孺人行年七十矣諸爲孺人之子
友者謀所以壽孺人不得某竊謂千古侈言鮑宣有
妻而孝廉公得之侈言子輿士行有母而穆溟諸昆
季得之卽內言不出于閩名城房闈乃孝廉公與諸
昆季之賢問有其于古而壹歸于孺人卽此爲孺人
之名壽寧有算哉夫麻姑上元列僊長生之稱秘術

也公卿冠珮珈服之飾浮榮也布幣酌斗吹笙鼓瑟
之歡俗情也則孰與婦人而丈夫者之聲施俾叢睦
巖鎮之間稱東海之法京陵之範與白嶽峙而青雲
垂者虜招搖之山有叢桂爲百藥之長長生家所服
而孺人懸悅爲中秋之夕適當其時則人天符也請
書此語侑壽筭而進之

汪母方孺人八十壽序

昔在辛亥汪母方孺人七十春秋諸爲母之子孟樸
諸昆友者徵蕪辭爲壽今去十年所爲天啓元年中

壽沈母姚孺人七十序

古之人結交先論行必推論其所自始今之君子略內而炫外務華而背本一時聲名氣魄之相藉而言道浸薄遂謬託於醴泉無源芝草無根之說身據其芳聲而掩前美此甚不然予蓋得之吾友沈無回氏無回之好古博羣書精研道術之旨落筆成文采此猶世所有而行已準於名義嶽嶽卓卓峰危壁立必不爲今之人則今人所不恆見向亦私懷無回師承何地何修而得此於是推論所自乃始得其尊公烟

江君以任俠好義稱所交棲水呂公需石門王公天
成皆負奇行於天下不侵爲然諾者也已又得其嫡
母孫孺人能宐烟江君恭事其姑顧陸兩孺人而相
勸而成其名行者也然禮無非無儀內言不出於梱
又歷於所尊雖有美舍之弗敢成也自烟江君僊去
而孫孺人之賢問著自孫孺人以老壽謝人世而姚
孺人之爲匹妃爲賢母乃益著姚無回所自生也蓋
無回之言曰姚母之事顧陸兩大母也猶孫母也其
事吾嫡母孫猶兩大母也吾長姊孫所出而母依之

亦猶夫孫母也方先君子好冲舉之術屏內幽居而
母與孫母同臥起者幾三十餘年孫母持家秉嚴母
不弛孫母御內外戚疎人有恩紀母不遺孫母晚得
末疾而母手爲調劑哺糜以進者無朝夕孫母老而
病不絕腥母亦腥孫母革之日乃母齋素禮誦佛如
來之始是母之與孫母形骸二母也孝義之相得以
成一母也閨閣之內具有雍熙豈惟詩人所詠膠木
小星之美而已乎絲斯以觀水固有源而木有根也
沈氏之吉祥善事發端於顧陸兩孺人而孫母承之

厚種於孫孺人而姚母成之天道好還挹彼而注此
耕前而獲後則三母之所未盡食必合而萃之姚母
而榮華福澤之報非生有無回之言成文采行準名
義則疇與昭式穀而康老壽乎哉天下事真有不可
知而可必者姚母是也夫烟江君好冲舉之術不盡
享其天年而三母以賢婦人得之顧孺人九十陸孺
人九十有五乃猶祝其婦曰無似我早折而孫孺人
八十有四矣顧姚母曰願母百年見兒子榮華亦無
似我然則母之壽術不必問靈秘於麻姑上元乞大

藥於西王母惟孝義名行兼三母而食有福豈淮百
年卽無回奉珈珮進大斗之日亦皤皤國老未可知
也母今年甫七十耳無回之門人丁洪夏錢弘業輩
請予言爲母壽予交無回深推論行詎因邇無回所
自始而爲母初祝如此亦今後世知無回之交予不
減若翁之呂公王公也

太宰曾公七十壽序

代

今上曠然日月告成三大禮定國本新天下之政而
用人惟舊簡在一二元老則大司空曾公再起南太

宰而春二月值公弧矢之辰公卿冠帶之倫郡國大小吏瞻山斗宣誦者不可勝數某故辱國士遇之者也知公特深嶺北守巡使者某某竝荷知公於是謀一言壽公以屬某竊惟人主養壽命保世滋大錫極億萬姓則必有端亮碩大之臣清湛其鑑而厚施其澤大臣受天子倚毗在知人在安民亦必持所爲尊寵博裕者慰天下之望以休壘諸福蓋積貯之以爲身而浸灌之以爲國家其於葆護元氣育神導和之理一也俗士急功名巧用之陰易人主與時上下

才者未聞道好持其矯矯曉曉之習以自標其概而
雅不可一世彼夫生民之肥瘠與天下人之賢不肖
漠然若秦越無關於心此猶告卮勺水耳其中固可
量其勲名福澤亦可測而測乃今得之曾公公少年
成進士授刑曹郎改儀部轉而司銓數歷四署有裴
王之舉一再轉京兆開府貴易當是時柄臣操一切
之法擊斷天下天下困於束濕直若詘白若辱唯唯
無所不可適而公以其渾厚者持之以石介遂飄然
拂衣去已上春秋鼎盛務總攬天下之局變士仰

首伸眉各展生平所鬱勃磊砢之氣公起家南太常
尋晉大廷尉少司空提督壽宮再晉司空加太子少
保人度公且嶽嶽雉犯剗剗惟意而公以其特立者
含之以淵靜 聖主方殷殷嚮用而公銳意陳情龍
見者且退而野伏蓋公自振鴻漸之翼晉陟崇臚者
逾四十年其間縣車委馳者逾十年而某幸辱公知
又幸承乏茲土以窺公之深大邨公鑑清而度和中
介然不惑又溫然無所不可容其精神莫急於知天
下之人俾賢愚大小各得其理期於罔人主之恩澤

而不以私愛私憎與無論進而巖廊與退而徘徊桐
臬山水間海內之薦紳士大夫賢不肖若燭照諸郡
國部屋之爲利爲益爲顯害爲隱憂咸進之几席而
撤肝鬲大小吏靡不奉之爲菁莪而尊之爲指南公
之神識力度實天所縱以安國家鎮社稷爲主上封
殖天下之元氣以錫極億萬人保世滋大者也頃者
宦豎從橫緹騎絡繹於道四方重足所在騷然世方
慮聖主不測無所措其轉圜自牖之術而猶不忘元
老若公者終不以桑孔奪稷契之佐真千載一時某

猶憶往者公爲大司空以曹郎事公時大司空與大
內貂璫事多表裏扼之則齟齬媚之則屑越而不可
問而公調御其間可親而不可昵諸錢穀費屬冬官
者若營繕內外大小土木若虞衡若山陵若梓人匠
人輪人若陶冶諸人若木屑瓦礫公悉手爲畫一成
書卽權璫不得以意增司官不得以私請濫出入莫
不漢服公之矢心爲國計又遠類如此夫人情不甚
相遠公行卽秉衡坐廟堂進退百官以其曩所調御
者回聖主之慮廓清宵人之氣俾天下賢者有所秉

成不肖者有所懾而無所憤激導一世泰和而海內
復見醇龐博裕之化公之大年且與周召爭烈卽錢
鏗喬松不足侈公公固衍衍俟之矣

壽封尚寶少卿徐翁八十序

代

人有言吾所不知者壽而天地間亦不乏壽之人也
然而能有其壽以自縱暢其所適甚難夫山林稿寂
之士吐內存注積貯而獲天年亦何與人世有無閭
巷愚夫婦豈無龐眉皓髮之人或未旦而爰夕脯
未秋而怯寒縞絕不知有生人快事而古之賢者八

十而載車九十而蒲輪已榮矣而匍伏道路以答世
主之一盼終身逸樂奪之頃刻若此者即賢愚貴賤
不埒等皆天地之所束也夫有其壽而自縱暢其所
適爲天地私予則莫若吳之徐翁吾聞之徐翁美鬚
長大瑰瑋丈夫也家故雋盛甲郡中壯而稍落羣從
昆弟多文弱不任門戶事而翁不少爲輦感扼塞態
也其精心足以祈事而強骨副之家內外政不煩麾
指籌算而業已隆隆起矣其嗣君某起家司理出爲
名御史爲天子持繡斧巡行諸郡國所至有鴻駿聲

而翁自六旬餘以子官受章服者再則已儼然貴顯而翁不以貴顯自矜重也縱屐于山縱舫于水縱杯酒于聲伎嘯歌簫鼓之間遇良辰美景未嘗不先諸游客至也宣髮鯁齒飲噉自如其飲而酡酡而歸又時時後諸少年諸少年豪者不敵也繇斯以觀凡人間世貧愚之所窘與賢貴之所矜而翁一切不受縛也生平負有俠腸能急人之急憂人之憂親交有憤厄不伸者請于翁無不立應以解而又不以爲德豈與夫稿寂自封而弗與世同憂喜者倫乎哉今上

仁孝治天下備極尊養而侍御君且晉擢公卿間推翁所與世同憂喜者日樹鴻茂之烈翁日衎衎于泉石觴咏以縱暢所甚適有橫金披繡之榮而無蒲伏登對之煩以餘付侍御君而以神自快足翁陶陶乎爲百歲以上人無疑古所稱千金壽而萬年酬未足爲翁侈者某衰老至矣強被而爲主上仔肩當世而不得自己因于某某諸君之故爲侍御君屬者述翁行事索蕪文爲壽羨翁所爲縱暢自適者而綴之言見人間世之壽亦自有可知而必之者翁也

吳翁七十壽序代

古之所謂鄉先生者其爵祿非必有詔於朝其功名非必有著於國而言爲鄉人模行爲鄉人楷夫亦曰一鄉之望云爾故陳太丘黃綬小吏而望出廷臣之右庾桑子避居畏壘而俎豆賢人之間彼未嘗爲離奇怪瑋之事炫燿閭巷而日計不足歲計有餘必有所深服乎鄉之人者而今獨以簪笏冠纓之士當之陋矣如我雲麓吳翁其庶乎翁天性樸質事父母以孝聞待其弟儆韋君極友愛所居耕桑自資不爲牙

籌刻核之計號稱素封而處澆能醇在豐用儉既教
其子子往登賢書矣而謹廩自若無世俗揚詡得意
之色邑有里甲之役掉身而起之不少避至錢穀之
出入抄撮而上必清以覈曰吾庶人受若役義當如
是論者不難翁之廉幹而難翁之往役蓋三吳間稍
馮藉氣力此斤斤赴義之風邈矣抑予又有感焉所
稱孝廉者昔漢帝所以淑民心廣教化美風俗詔二
千石長吏興孝舉廉與計吏偕又有力田孝弟明經
文學賢良茂材之科各不相冒而今之歌鹿鳴舉於

鄉者或以當明經文學之目其可耳而世亦相率孝廉之何居予以爲必若吳生子往讀書而學道飭躬而砥行乃名真孝廉必我雲麓公之孝友恭儉乃真孝廉父也嗟乎亦難矣然則翁之盛德有合於古太丘庚桑子之爲者奚必其爲公卿大夫以冠簪之浮榮夸耀閭巷人爲哉邑大夫尊翁行誼禮請爲鄉飲賓亦古者力田孝弟之遺而子往今且上公車致身霄漢不遠翁今年政七十耳異日者翁自耄耄而期頤又以子子往貴朝廷行憲老乞言之禮吾知吾鄉

人中合翁無人也翁之姊爲予伉儷故知翁莫若予
予立朝四十年廩廩奉法罔敢失墜未嘗不以翁之
處鄉爲師故直述翁生平起爲壽而以是解翁頤酌
翁大斗可乎

張母劉太恭人七十壽序

大恭克雋張公之生母夫人曰劉太恭人以天啟二
年月日爲七十縣悅之且克雋以賀 上萬壽行還
爲其母壽海內士大夫與所親交矢歌詠奉千秋觴
汝亨不佞忝同籍託於氣誼甚深猶子行也缺壽壽

母之頌而嘉湖兵使者晦伯方公與克雋同官雋守亦念未有以將乃貽書不佞亨曰張母吾母也吾子安得無一言稱之汝亨不能辭則竊念以爲世之人子未有不願壽其親者也顧士當約結糟糠不厭不得致其歡而士大夫宦於朝者恃祿與位以爲榮而行業碌碌無可稱榮其身而辱其名蒙王介甫鄙夫庸人之誚則賢父母所不樂故言孝者謂顯親揚名必先之乎立身行道則人子與賢父母之心兩相得而無憾此千秋之樂聖人之定論也而無憾實難乃

得之克雋所以事劉太恭人云太恭人之聞政令德
不易悉數卽克雋奉母氏訓亦不能一一刻畫其似
舉其大者太恭人自縱筭事養誦公迨公垂年恭謹
勿替其佐萬太恭人居卑執順不敢踰而克雋視之
篤孝友廩廩退讓不以學術才智先人太恭人和丸
晝荻勉之誦讀而克雋沈澁經史博極羣書能文章
通天人古今之略卽經身緩絰技吟不讓太恭人綜
理家務操作不勦而克雋敷歷官下從兩爲令入爲
郎出爲守至治兵我越東勵精舉職竭在公之勤太

恭人衣弋絺飯脫粟用物貴嗇而克雋所在清約飲
水餐藥砥素絲之操太恭人長齋繡佛圓寂好脩不
以爲善市名而克雋棲心澹泊含章致用沉幾御物
卽今戰悍卒馴橫民綏靖之勲枕席東南亦絕無功
能之色蓋克雋行醇而學邃才高而器宏其載位食
祿皆立身行道之藉旣入而奉太恭人七箸無約結
不脰之歡而出而爲明王救民禦衆勛襄當世非
若鄙夫庸人榮其身而辱其名者爲賢父母之所不
樂從此而位愈高則道愈遠其名業表豎政未可量

所以顯揚太恭人者當益盛卽與陶大司馬雋京兆
崔庫部歐陽文忠之四母竝垂千秋寧惟五文之誥
六珈之佩乎哉且闔太恭人聳耳神明不減壯健而
諸孫十餘人藹森玉立太恭人含飴弄之榮華方來
不止克雋兄弟舞斑爛樂百年已也詩曰夙興夜寐
無忝爾所生克雋以之又曰壽考維祺以介景福太
恭人有焉汝亨不佞敢以是語書之策致之晦伯方
公進之張公之堂以侑康爵

程母黃孺人八十序

凡稱壽必本於德而稱閭德比鬚眉男子爲難記言
內言不出於閭易曰无攸遂亾論女子束身閨帷之
內無所表見卽爲人婦人母巾幗笄珥之流斤斤井
臼亦安所表見古傳記所載爲女而慧爲婦而哲爲
母而賢擅一美亦足以表流俗著春秋未必兼也卽
賢而能母亦自其所怙本宗子姓而止不外及也兼
備之而能表見自內而浸外德積載而宜享有長壽
則無如新安之程母黃孺人程母蓋太學吳長孺祚
之外王母而張君幼蓀斐之外母也中秋之月母八

十縣悅之辰吳生從予游最契借幼裁來徵余言爲
壽余故具聞之母未笄而父黃翁歿無子諸爭嗣者
紛不決母以一女子侃侃申大義定當嗣者而孝事
母洪不衰此女而慧也既歸程君敬甫所以承尊章
甚驩敬甫爲諸生時日夕女紅佐之讀遂成孝廉之
名孝廉見背承歡尊章如初俾忘其老忘其子之捐
子舍以訖於終事無憾而操家秉業日昌可不謂哲
婦乎所舉三丈夫子舍而能教伯當戶命服賈仲若
季負穎命服儒仲被青衿有聲季嗣振而子之子亦

振振起此其爲母爲王母抑何賢也且非獨爲程氏母而已女之適吳倩寧甫者中寡勗之立節撫孤長孺兄弟於是乎以砥行克家聞適張倩幼裁者命以置貳廣嗣得甥九人森秀階庭兩姓子所爲外家成宅相者方來則母豈惟昌程氏後無隕孝廉之問所爲黃氏延血胤而永宗祐兩女家庇葛藟而衍螽斯者疇非母耶則亦豈惟程之百世水木本源願長怙之以爲母而挹此注彼彼三姓之裔亦疇不願長怙之以爲母而天所以隲母與人所以頌母壽母豈有

量哉昔有女僊黃靈微者年邁八十貌類嬰孺今母
亦生於黃母洪夢李靈飛佩護遊於庭而生是固僊
種也而又備如是之闔德合內外子孫數十百人之
頌禱以爲母壽而何疑於大年母今者亦猶嬰孺之
日也夫以是復吳生歸告其母從張君幼裁書其語
於策叅鞫鞠臚進頌之以侑母康爵

寓林集卷之七

武林黃汝亨貢父著

序

策衡序

策之雄者亾過於戰國之士與三國之人才然皆偶
機觸辨以權智相傾軋已耳而不爲組織之篇在漢
粹醇若天人英通若治安沈簡若趙營平刻覈若晁
大夫輩陳篇矣然各就一代之變一人之才一事之
則而極其用其出有本源學有積貯因人際事展用

而乘其時又彼問此對響答象設以事成文而非以
文撫事故爛焉足述也 明興制科得人最盛而終
之以策直欲網羅千古苞孕衆智綜錯萬變而又先
之以經義爲排偶章句之文書生執理卽遺事騁辭
卽迷務喜倜儻非常卽卑鄙學究一人之身耳而舉
天人治安屯田實塞古人之所分長而以寸晷尺幅
兼擅之其學必無本而其言論必不可以施於用亾
怪也一人之筆而可以羅千古苞衆智叟億萬之變
庶幾可施於用者亾如主司之自爲程策而冠諸錄

者何者其所對之人卽所問之人非其有本而多貯
爲生平之所得力而勝乎物其言不出也故言成文
章施於當世亦成用如弘治山東之澤道德而藹仁
義至矣其次如新鄭乙丑之深江陵辛未之悍瑯琊
湖廣之淹雅雲杜陝西之英奇允寧蕭孔之篇公望
騷雅之作他名公鉅人靈珠隋壁雲蒸霞變不可勝
紀要皆傑識匡時宏文托志書生之所窘俗吏之所
疵腐儒之所拘叅伍以變會通其觀古可以適於今
今可以程乎古儀秦失其辯司馬諸葛失其智皇王

之略天文地理人事之紀俱在焉嗚呼此策衡之不可不讀也孝若夙有妙才文弱登壇乃其志略在當世黜然未究於用而露一斑之識衡鑒茲編領袖末學良亦遠矣雖然子孟無術亦足以辦事而馬服君之子以父書敗夏狐裘越章甫推舟於陸而用與時不相當智有所詘策有所不及則存乎神明之力勿謂中郎帳中之秘勝人也

論衡序

萬曆乙巳孝若刻策衡余實爲之序讀者曰我輩得

此可以策當世取高名矣而論表闕而不宣未厭也
又十年而論衡表衡成余又序之夫論之作雄始過
秦曹同六代學而爲之也奇始非有先生王褒四子
講德學而爲之也賈生東方生創作此體故雄奇變
化不可測識王與曹因人成事已不足貴又况聲無
哀樂宅無吉凶屢難屢答聚訟不決豈復有論乎至
韓愈諍臣柳宗元封建則不然亦創而爲之非學而
爲之者也故其盛名與賈誼東方兩生等至若科舉
之論又不然朝各有體文各有時苟其違時而乖體

雖雄奇如兩生無所用之故韓愈文起八代之衰終
其身求一制科而不可得以其違時也今制舉首經
義與策表論皆試而用之皆時文也然風簷之中有
時未必有體有體未必盡有學術辭章以瞻之獨程
論兼三長綜異代而運以已筆庶乎隨時見奇而燦
然可讀此孝若有論衡之刻也嘗攷後漢王充所著
書八十五篇名論衡其言淹貫今古而不免蕪襍之
誚蔡邕目爲譚助且爲帳中之秘孝若茲纂令人人
共咀且嚼於其中而不忍秘其益廣矣乃有夫取而

無品題孝若以爲此衡也則錄之兩之鈞之石之在
善用權者哉

表衡序

以表取士古未有也此 祖宗所以教事君也蓋論
以極其情策以盡其略草野倨侮者未嘗無焉試之
以表而君臣之體絕廊廟之文嚴雖猖狂無忌亦必
諧宮商肅仗伍始曉然知告君者當如是然此 祖
宗之意而不料後之日赴於浮淫也表者裏之反猶
云明耳太史公表三代則世表六國則年表秦楚之

際則月取其明耳班固表古今人物則分爲九等取其明耳孔文舉薦士曹子建通親親其稍用俳也凡文盡然不獨表也前後出師俱家人常語而後之君子比於伊訓說命則表之爲表可知矣及唐之世抽黃對白相錯如繡其俳麗極矣亦凡文盡然不獨表也韓文公潮州謝上及諫佛骨諸篇俱不爾也宋之表莫過歐蘇王介甫輩此祖宗取以爲訓者今其書盡在何嘗不光明宣朗了然於口而必雕繪爲精新裝積爲有學浮淫附贅何其陋歟雖然此亦時之

所爲論與策俱不免何獨疑於表孝若存其最善者以佐敎事君者而已矣嗟乎論表策具而衡爲全衡全而權乃可用是書也雖謂孝若之權書可也

靈鷲山素業序

古者父兄之詔子弟師之訓士惟孝弟力行通道略物束於廉恥雍容禮節亾堙其本始墮其所有事而獨後於藝文今則不然父兄之於子弟自童年乳臭玄黃初剖學一先生而授詩書輒以科名相豔文辭相矜委蛇世資遷徙如園屈志滅質移才鷺俗背畔

先生之道而有所不恥師以之教弟子以之學道喪
世俗溺心若投珠於淵沉金於沙輾轉相屬倖成而
驕敗亦亾悔若毒藥之鸞鼓百餘年後且聞其氣以
死悲夫人之患在好爲人師非人師之可廢而浮文
蕩心與俗趣舍者之可爲太息流涕也某家貧嗜僻
聞見寡眇闇於道術卑行亾度豈其偃然臯比挾素
王之道以令羣材獨唯士之始業藝文一途違其所
趨而糾繩墨之論放諸玄眇力誠不任人亦不附語
曰善戰者因其勢而利導之沿流遡源窮末返本做

性而立修辭居業其庶乎方內挾策之士聞其風而
謬尊之爲壇靈鷲之山某於是忘其固陋從吾所好
與二三子約三章之法曰凡人有材短長靜躁受成
於天億變爲形惟虛與明若合符節在心爲神在題
爲旨在文爲體函三爲一同出異名言所信毋言所
疑適已意毋適人意而後披質綴文諧聲合采各成
其至毋亂於得失毋弛於中道毋悔於白首出則政
處則文夫道一而已二三子乃瞿然立肅然正襟而
對曰謹受教朝於斯夕於斯應求於斯矜者抑鈍者

奮歷一寒暑而揣摩之編成爲總其大凡絜長量短
喟然而歎曰甚矣二三子之嗜學也先王之道不離
藝文而得本始惟浮文焯名惟浮名蕩心生心害政
生政害事一時受之百餘年而不化投珠沉金吾爲
此患以無解於有道先生之刑其免也勉旃哉崑崙
無極滄溟無涯保而持之知險知阻而乃可以立於
四通之衢爲汝災木以鑒於人而匪爲人鑒題之曰
素業業言習也素者質也以言其本始也大輅肇於
椎輪醴酒造於玄水黼黻備於純白去俗遠去道近

拙文伸志受成者不移吾與二三子之所守也雖然
是是非非相尋無窮才者不乏遠爲雄伯二三子誠
有所不足者而吾乃妄諛之嗻然慕古而卑俗得無
有太息流涕還以悲予者乎

素業二編序

昔在癸巳爲壇靈鷲山與二三子約三章之法曰夫
文在心爲宗在題爲旨言所信毋言所疑適已意毋
適人意毋亂於失得毋廢於中道毋隳於白首出則
政處則文夫道一而已二三子過而聽余追嗜逐好

不相捨去者有年四方之雋踰河蹈江跋跡山海而
至者疊疊不已則汝亭有懼心焉夫衣布被褐不足
以耀黼黻之目飯粟茹藿不足以爽魚膾之口小言
庸論不足以望才士之腹某將乘風昔捐舊好更求
所以豔耳目愉心慮之說而竟不得也二三子高者
若墜卑者若登中者若跂相與聚而謀亦欲更求所
謂玄妙之法矯捷之徑而亦不得某於是擦席而呼
曰二三子來二三子來余與汝登山而臨泉於斯久
矣寒空雨靄日麗晴翠其幻千變山故如昨也江

莽蕩爲濤爲雪爲風霆爲游絲其幻千變泉故如昨也文章猶是山雲川月峰峙水流起滅毫楮間其幻千變亦不可得而盡吾與二三子覲面而親搢指而授藉令去故而喪我又寧能相識虐哉余嘗懼夫庸師之誤人甚於庸醫之殺人無他其所謂庸者不庸而故者非故也先聖有言溫故而知新可以爲師余則安能釋昔者之法而詭遇二三子夫亦相與尋三章而討之心胡以立宗題胡以立指信者安據疑者安伏適者安往亂者廢者隳者之念安起一者安在

譬猶抱病之人各自索其病所自受而醫者亦密察其所受循脈按方以融通其意相與歸於無病而後已二三子於是蘧然霍然離座而起曰有是哉子之引人也吾乃知新之非故而故之推新也法證心心證題題證文衣被乎布褐而滋味乎藜藿凡夫無所關才士不得馳天下之神奇果無有越臭腐而得之者精動而變蒸蒸然不自止矣雖然醫者眎病爲病醫者亦病則又轉而望救於他師吾懼夫庸之誤二三子而殺人之爲禍烈也於是衰次其文嗣刻之以

證於有道曰素業二編

壇石山素業序

余生不聞道又賦材拙未讀天下之書往者偶以師
心之技棲息靈鷲山二三子有謬而問字者與之互
證於是有靈山素業之編今不自意折腰爲鍾陵令
書生之長徙而芻牧衝方愁民扶匡不暇懶不能爲
嵇生勤不能爲巫馬子期退而自惟未嘗不拊心汗
面恍恍自失而諸生虛影相逐不知吾之非故間有
抱文而過者鍾陵故有書院集士余不敢廢時期而

簪聚於斯間亦自忘其吾之非故輒以習心應之相與短長其說而又不自意有庚子役俾瞽者與玄黃之觀得士九人合之得文百餘篇所許可不足爲士準而士或以此相索筆墨不勝應於是乎災木而雕之亦題之曰素業嗟乎易稱大業富有日新其德不止菟文一途宣尼設教標目四科漢重師承而季長經術有道人倫相遞而變訓詁之傳流爲應制而士之靈心穎質受化於時在璞後雕亦難其人至以俗吏之目繩天下恢弘侷儻非常之士士不俛首下卽

奔焉自放此墨翟所以悲絲揚朱所以臨岐而泣也
要以卽心爲習緣習見故所業不同今曩可覆無違
心之事必無違心之言亦各言其素也已矣豫章材
藪士矜重好修邑多子羽之節奇服者不盡見見或
不盡奇抑或有所見而不在譚經課稅之座不敢載
也縣所居壇石山之阜故繫之壇石乃文之佳惡識
者自定之

壇石山素業三編序

蘇子瞻自言我今惟有無始以來結習口業妄言綺

語論說古今是非成敗如人善博自云是巧不知是業則今世所爲舉子業文亦口業之一端余不能爲巧而莊語法言庶幾斯道抑又未能則亦不可不謂之業自與諸生鉛槧山中若而年今復不能謝絕官下無始以來我不能知其亦所謂結習未斷邪伏波老矣而據鞍上馬以示可用何爲也水以造波波還爲水性率爲習習亦成性修詞立誠爲業妄言綺語亦爲業等業耳造者其誰旁觀之人不得而與也生心害政生政害事自舉子而服官設於衷流於物其

爲安且綺不可勝窮如索塵岳如學毒鼓百千年而
不化則豈惟口有業而身爲菑可畏哉余亦嘗自觀
省思維自余爲令一日之間呵罵嘻笑習氣紛作造
殃積悔隨消隨長者亦不勝計則庶幾口業中之舉
子一業猶爲流塵輕霰薄乎云爾隙明偶開片語乍
會或未甚墮矣綺之辟宐乎諸生之謬而習余於壇
石山與習余於靈鷲山無異也壇石之山月有會向
從余游者有累年不相通四方之人或各以其山笈
所便而至習心相習余亦得縱觀之而錄其佳者若

千篇題曰壇石素業三編業仍其素其亦藉是以逃
於口業而又安知素者之不爲妄且綺也

素業五編序

余自壬子秋來白門至今幾六百日除劾官下之日
非馳覽山水則四方人士執經問字之日居多余非
能挾所長先人亦似有結習在覺與諸生譚可自率
曾懷先後所課文及得自遠寄者幾二千餘篇亦隨
手答去存其佳者得百餘篇仍名素業嗣四編而五
嗟乎文之難言久矣法度之論非所以繩末世至法

亾而趨利捷效顰學步以套爲法令覽者欲嘔余甚
厭之今文亦不必盡如古文然讀古人書多時而吞
吐於筆卽尋常字句自與凡語迥絕至於靈心通道
無古人句而有古人之神卽作者不自知抑又難矣
余不敢盡持此論相士然沿襲可嘔之句必不令其
竄入筆端善用古人書與能行古人之神者卽一字
一句必爲之歡喜讚歎以拔其頽落腐朽之氣孔子
曰不得中行而與之必也狂簡乎狂者進取茲編近
之矣至於士遇合有數存於其間不盡屬之文卽不

遇而文自在余持論如此而已不知天下人之心同乎余否也

素業六編序

素業初刻起余讀書靈隱山寺時遞刻至六編則余寄官白門三年內四方從游之人以文質者也升沉不同途先後不同輩吾第以文論在循本題理格以盡其法攄自己心性以盡其才而又能湔洗剝換以盡其變要於不改其素而止庚戌十門人癸丑五門人別爲刻丙辰亦五人所寄來篇帙少又偶值刻六

編時遂附焉至於俗習惡套亦有用之買名聲者恐後生效之以自爲能不得不詳列於篇除惡務盡我不敢不討此刻中亦有字句犯者其全體自佳則曠之考珠之類吾不能廢也吾亦有近作五篇附之未必極佳儻用商君反坐之法或可遜也

王逸季墨卷選序

自荆公罷詩賦開經義之科風雅寢薄荆公亦自有驅進士而學究之悔 高皇帝創垂不改其制士奮筆起厲意一術樹鴻鉅者不絕而雄雋之材往往內

厭而思遜去以爲快曰是 高皇所以欺英雄而挫其銳磨厲其流宕不屑之氣塞於大道嗟乎豈其然也六經四子精微之言詎減詩賦庸者汎涉無歸寧如一尊而博通之儒兼總條貫奚不可者厭生玩玩生逸逸生淫於是浮華相標虛氣相夸渝忠信裂繩墨生心害政流於無窮上標之爲軌下蕩之爲風文章之變可勝悼也端其範移其風如響斯應如倡斯隨神而化之使士不厭則亾如程墨程範人嚴墨入人易程所以爲軌也墨風之漸也然程居方墨行圓

程儲精多收物博積思長裁文斷墨儲精少收物簡
思審寸晷文束尺幅程上潔道下博名高有是非而
無得失墨不盡蘄合道蘄遇主不盡爲名高慮不成
名內櫻於是非外亂於得失是故墨之難爲工也有
用短而成用長而敗有律而負有浪而勝有奇而之
庸有庸而之奇其儵忽如風雨千百億變巧歷不能
盡其凡大都行其思之所際以與氣符而溢之乎詞
而寡特操故鑿程者不偏貴格貴冲夷自理如風行
水雲行空鑿墨者不偏貴氣貴精醇自定如金在鎔

珠媚淵程以立常墨以盡變常統於一變散爲萬蓋
至於今多文少質奇詭橫厲常變龐雜吾不能辨其
程墨之體矣嗚呼歌者苦而知音稀自非澄清虛以
爲鑒通倫類族開於道術之旨烏能別涇渭於末流
哉某不自量每欲附宣尼竊取之義舉應制業次第
其品毋令耳食之夫以虛名誤而有所不遑吾友逸
季先爲之太上拓基神理妙於自然其次出奇無窮
各恣所之從厥攸好其次句字之間流響錯采小道
可觀傷其湮沒文章之變人心之符道有升降俗絲

習革璨然於篇若職方氏貢九州而吳公子觀十二國之樂泱泱乎風風乎可以風矣乃若闢幽微顯摘瑕見瑜勸百諷一覽於精微以破世俗浮沉之論又逸季玄鑒所欲爲政几席之上範軌來茲者也海內與於斯文者論世知變然於其然則經義亦足盡士士必不至以虛名誤卽荆公所謂驅進士而學究之悔逸季且爲一灑之矣

王逸季門人稿序

昔者子路問聞斯行諸子曰有父兄在毋有問聞斯

行諸曰聞斯行之余嘗讚歎此二義者總攝天下之義有兩而敵應有一而互操古之名將往往以之提挈百萬出生入死而不悔其虛實奇正增減多少之用不可勝紀執文之士莫能解也今之執文未必遜於古之道術其動如生其靜如死爲之師者提挈天下之材雋亦宜不遜於古之名將而亦莫能解者何也夫亦各膠其師說而不相下抑其師之說有工拙利鈍邪夫拙而鈍者莫若余其語二三子循繩守墨奉法稟道若曹相國之斤斤畫一於三章然而讀吾

友逸季之文橫行妙合取精集美舉天下之文士若無能操勝筭而出其上未嘗不爲之低首折心也逸季文名滿東南東南之雋者多登其門其文有玄有微有巧有俊有煙高有霞舉有劒戟有譏弩有飛舞奔蹕大都得逸季之意各縱其才情之所極以凌軼天下之茂雋若韓白之兵上天下地無非生門斯亦天下之奇觀快論也逸季訪余靈鷲山余因得窺其武庫歎服而已而吾門有腐生且私相詫曰秦之銳士不足以當桓文之節制桓文之節制不足以當湯

武之仁義意者先生始欺我也不知世有湯武則精銳節制皆華山桃林偃息之具夫既不得已而兵之則三章之法豈所加於井陘淝水之上哉客有聞而解嘲者曰兩君狎盟齊晉號今天下不亦可乎余曰正或不能譎則不敢夫夫有霸之心也不可以訓二三子吾守吾之拙鈍以遇婁東之師二三子有能爲公西華之惑者則渙然解矣是時余有素業二編之刻而逸季亦刻其門人稿行世因書而爲之序

正始編序

余少年酷嗜成弘間作者之文卽才華學術不同各
根本所學而致其才俱以理爲宗格爲律氣爲御詞
爲經緯精如絲髮之不相亂而天然自在如矚目頂
踵之不易位無論已至者之妙卽漫漶敗筆而先輩
氣格自見譬猶商周彝鼎王謝衣冠自是人間清貴
之具凌遲至今無論敗筆不足觀覽其佳者已如貧
兒富扮市門喬妝中無所見而名相流浪於傲僻之
聲舛襲於近似之理追維成弘如以戰爭六國馳想
揖讓之代可爲人情世道流涕太息江河之流誰爲

砥柱而豪舉之士以細過失之又可慨已竊謂欲制
科得士莫如正心術士正心術則自少年之習爲文
字始少年習文字必不可令舍成弘間作者而爲之
詭遇何者成弘間作者非但文章典刑而治世之氣
象亦隱隱隆隆可想見也嘗記爲童子時有復古錄
從先錄繼而有明文品彙繼而有原始錄先輩名法
家具在今多散逸於諸生鉛槧中不謂吾友元素與
余同嗜而爲正始一編剝碩果不食而魯靈光尚存
卽元素所評騰彼讀一過如隔世而見故人移身而

獲其心其欣暢歡喜真不知手之舞而足之蹈也余與元素有子皆初學爲文而吾兒猶草昧未理因爲元素題是縑而命之少年信服此法卽未遂成文必不至流壞心術爲無家蕩子余亦附元素作業舉功臣耳雖然少年嗜酒者喜讀太史公淳于髡傳所爲堂上燭滅男女錯坐以爲傳神而畏苦鄉飲酒之禮吾未如之何也已矣

昭代文通序

先是丙午歲元素在長安歸院之暇攬成弘以來業

舉作者彙一編授帷中生題曰正始余草草題數語
大都慨末流之濫而歎先輩名法家之不可及亾何
元素拂衣湖上則復取隆萬以來業舉文蒐獵之拔
其旨不背作者而格不謬成弘者合焉命之曰昭代
文通屬余序而流傳之余既披覽竟作而歎曰嗟乎
文不在茲乎人亦有言心之不同有如其面而文章
與時高下閱世觀變良有然者乃命世者獨不謂然
何者不同之心機智徂詐之心也與時高下之文寒
暑之遷而榮瘁之態也若夫本始之心含具靈妙條

達義理爲物不遷與時偕行古聖賢以之作經立傳而昭代定以爲制文士稟以爲程傳辭宣意隨題賦形鳧鶴之脛不容斷續山水之音互有寂喧若川會海若血周身隆萬以前成弘而後皆是物也故曰天下之動貞夫一者也聖人有以見天下之動而觀其會通以行其典禮夫禮豈通之所岐而通豈變之所礙哉明昧信疑存乎學者耳矣學者不識本始之心而逐時耦變則唐虞之代而有巧言孔子識其心得其通卽黍離之衰可以見文武禮樂之器元素之所

稱交通是也至於削除之嚴有同郢斤采取之廣不遺漁罟而篇章句法指示前津幾乎室燈眼鏡則元素之有功末學偉矣

陳孟常本經草序

宣尼有言攻乎異端斯害也已故儒者以經爲術遵王之道罷黜百氏煥乎其有文章也周衰微言息從橫交作孟軻凜然而懼曰反經而已矣是以宋人雖惟於文猶得依經立訓俎豆素臣之例其精可用也後生學士以文絀宋而忘其爲孔孟之功人故淺經

術而膚引百氏讀其言相詭而靡又百氏之所不錄也居嘗與孟常言衡文者奈何弗凜然而懼涓涓不息流爲江河哉將範我馳驅而不獲以經生老也孟常笑不答蓋明詔下而士霍然起而或卽之而或離之則又顧孟常語曰陳生語有之何知仁義已嚮其利者爲有德夫誠範我馳驅而不獲以經生老也不愈夫以詭遇罷者哉士卽湛深而博負豈其不爲名使而膚引百氏以與經術抗不然必且霍然而處乎卽與離之間夫本經立訓用宋人之精而俎豆之

是集義所生者矣孟常於是欣然出一編題曰本經
草屬余序而刻之嗚呼世或攻異而叛經則孟常可
廢也

范光父程文選序

文者心之精微也人心之靈千百億變出奇無窮而
古今取材者壹稟於法夫法非繇天降地出也標旨
於古初證智於神明猶匠氏之有規矩準繩而聲律
家之有鐘呂要歸於不可易士得之赴於主司者之
儀的命之曰中式主司者拔士之雋者以爲式以貢

於天子命之曰程式之與程皆法也是制義之三尺聰明奇詭者不得逞自古卽三代盛王之御世不能亾法殷因於夏禮周因於殷禮所損益可知已秦不師古燒詩書坑豪雋彼亦自有秦法而凜凜於商君如戰國之六王唐之五季互以其智巧相攫攘而凌夷崩壞甚矣文章與時高下按本朝之變成弘之間三王也隆萬以來厲氣而取精先秦也至於今橫意之所出自二氏百家以及稗官里諺之眇論皆可肆而獵之以希遇合而先民之三尺若弁髦儻亦有

戰國末季之憂乎夫人心不甚相遠也救亾法以法
救法之苛以三代前事之不忘後事之師各有所自
起其故微眇不可得而言在我者皆古之制也之法
也操於上則行操於下則明某草莽之臣無所攬其
太阿而光父氏之選出矣光父於書亾所不窺而精心
於經義特深其言抉微按律中獨有所證期無晦乎
良匠之攻苦操先民之三尺以救世而已光父令商
城法行自近客有自商城來者誦光父之政甚良卽
制舉義士幾爲之瞿然而化然則光父所爲式於人

羣者非空文也

皇明會元全集序

韓淮陰未登壇時人人自負不知其爲天下名將版
築飯牛之朋與霸佐王爛焉今古世無高穆則其人
亦雜之市販傭保而止此科第之所以重冠軍也海
內博負奇崑之士讀書通道略物廣心稱天下才子
者有之或未必長於制義長於制義而亦未必盡爲
文士之冠士固有遇不遇要以不尊不信定本朝之
所統壹隨時導化應機赴節則各有所尊以重於世

亦春秋重一元之義震澤渾矣大矣無所不有唐以理嚴瞿以辭溫田以神恬鄧以氣厚孫以質朴馮以骨秀李以體約陶以格練吳以力剛羣公分道而幟鼓吹當代青黃玄體遞窮遞變邈不知所自始厚薄虛實可得而觀方其始出未遠能厭天下才子之心按圖而索則世之有目者皆能賞其神駿卽羣公不自知其所至而各以其至鳴豈非天人之符有使然而固然者哉若略其一致參論異同卽以一人之手一日之試相提而覆互有短長惟夫固然者天授而

成之人鄉會憲試俱可徵才譬猶美人未出閨時與
結襜以後聲容色澤密移微變其爲顰眉疾首煙視
倩笑嫣然而媚人者神理自在讀元集者不可不知
其全也嗟乎士伸於知己淮陰不遇鄼侯大將之壇
矧目而不敢望聲應氣求則主試之文亦不可不並
覲然世有英雄之識能識天下士於風塵之表元者
知其才而才者不必元此所謂相馬者不以肥余嘗
謂漢高鼓舞一世鄼侯元功之冠而其識乃後於婦
人之一飯可笑也德玄魯卿余未獲深交其人讀是

集也而知其才因爲之序以告世之閑將略者固不必登壇而後見也

馬生伏櫪篇序

昔人有言陛下愛少而臣已老余讀之未嘗不流涕已而讀處仲伏櫪千里之語則歎志士患無志不患老至馬生某爲先處士門人少年負奇逮爲諸生奇最著躡諸生遂去而學劔學劔而歷九邊要害三爲大將軍揖客卒不成功名退而發憤復討故吾而事諸生技嗟乎豈非壯心不已哉願恨所遭時爲文法

章句之時藉令當渭濱菑川不載而鷹揚則策而賢
良馬生何愁不逢年也馬生行年七十其文精深蒼
勁獨邁流輩而抒中所敢言卽英銳少年高雲冠而
上朱輪其言未必有合如馬生者馬生近著文最富
不盡存存其著者得十首仲尼有言不知老之將至
馬生曾捉筆爲草中語愛年短而愛道長一語已足
千古韓非非說難無以自見吁壯矣哉世有處仲必
引之爲牙期之好予故題其篇爲伏櫪而刻之後生
毋老馬生而忽其言馬生可忽則自鄧禹蚤樹功名

後尚父無顏色矣

酉戌墨卷選序

朝家日以正文體爲事而正之甚難提名心而引之
正墨卷其目也自文士以淪落憎命而作者之心與
主司之眼若有司焉而不得自主賈人以文爲市又
從而溷之魚目夜光雜陳莫辨迨夫時過情定循題
按理虛中而品置之則文章之權伸矣余山居無事
朋來爲樂間有問近科某某佳者余不能答因命兒
子收坊刻汎濫閱之隨手評隲然見者不必不佳而

佳者不必盡見天下人各有心眼又不必盡同要以不失其正俾攻文之士以道誦命千百什一或有取焉

王季木制義小序

余里居靈鷲與移而爲壇石長所講席過從多東南之美齊魯以北絕少朋侶近以羅玄父得王季木以季木得周子寅徐孟明三君俱齊士所落筆俱洞筋擢髓不屑爲時人語子寅骨俊孟明氣贍而季木之思按之彌深其力又時如萬石之弩應手而赴理有

舊沒者出之說有已陳者掃而更張之每觀其臨文時幽討遐注真若不自知亾失衣冠泊乎神來出奇無窮卽東南諸雋何能駕季木而先之也子寅近已空北羣嗣季木起獨孟明以病格非戰之罪登公車而奏凌雲二子並驅天下之賀戰勝者誰往季木勉旃哉

丘毛伯制義小序

天地間善萬物之用者莫妙於動文動物也至應世之文靈機耦變出奇無窮令作者神躍覽者心開動

實爲之先輩爲文如唐荆川子濯孺子諸理齋父母之年二作可謂動之至極者次則胡思泉桂北海恣其筆之所至往往有域外之見意表之辭而拘儒小生畏視之浮者效顰而失其步所以爲動者亦甚難矣余覽毛伯近義十餘篇意之所命勢與俱至板者能活有者能無如古之舞劍弄丸者流搏萬象而擘遠空斯亦妙文章之用而致其動者已毛伯自言鄉舉時覽者閱初場幾以縱橫太甚落之然則能爲毛伯之文者効其動焉可矣

胡休仲稿小引

近世文士喜新說狎侮晦翁伊川諸儒先語至撮禪
玄二家之似以爲勝遂橫被時名叩其中絕不曉此
新故二端從何而起令尼山正法眼藏寥乎絕矣先
輩每稱唐荆川諸理齋之文綽有意義然終淪落理
徑中持以壓今之文士不服也吾近於友生中雅愛
休仲休仲亦謬而尊余向吾刻寓庸集小創理法休
仲已終歿不去口今更不知心許何似世或病余兩
人愛而不知其惡然休仲文具在其卓然於心而畫

然於言剖浮斂豔據勝名理若書家之李北海顏魯公挺挺風氣卽欲令余不愛不可得也不置今日復見尼山禮樂之器試推休仲以爲前茅乙未歲晏七之日書於五雲敝廬

章孟仲制義序

庚子余獲効拙目闈中得士九人章生章仲卷深沉蒼簡以爲必林間名宿不意乃後來之雋又虞其人或睥睨自喜目中虛亾人不謂恂恂處子也癸卯以臭乳兒屈座壇石甫仲又似蒲團上人自瞬目揚睂

外足不越階庭五步而文益深婉自超其兄亦孟因
得時時挾文過從深秀與甫仲埒而琢玉礪金矯矯
直上又似以孟之勁敵仲之婉其爲人亦如其文今
俱翩翩上公車矣兄弟二人相雄霸士林亦各相推
讓不及余笑謂章生伯夷叔齊能讓國而不能讓名
翁山兩蘇入京師逢歐陽子歎賞而聲價並重壇石
一拳石何敢標文學之科於是爲之序而刻之

方孟旋全稿序

文士有三疵研性理則堙藻繪放才情則隔幽遐騁

形勢則違節制然而性理爲基才情揔之形勢之
微此三美卽來三疵今也或是之亾又安得入乎無
疵者與之論文乎吾友孟旋二十年以前吾已賞定
其文是時所云理爲基者也墨守蕭規未之易也浸
假而情來矣浸假而勢成矣理生情故幽遐微焉情
生文故藻繪渙焉勢生高生下生中故節制行焉作
者不知其至是也蓋孟旋之貽余書曰二十餘年性
命所殉節度之所以淺深窳會之所以得失心幾及
之而不能了之於手與口藉吾子知我勝我自知庶

幾定吾文天下人有可考信耳嗟乎至乎性命殉之而何理不研何才不達何文章之不立孟旋之晚而就功名也孟旋之窮而文章之達也後生小子欲速其功殖學薄而貯思淺譬之野狐禪妄希棒喝之捷而不知齋誦戒律之勤苦此惡足與觀孟旋之文哉嗟乎如此而獵名以去者多矣吾言不驗天下其誰信之

茅孝若書義序

余嘗謂書家大小事無二體文章家古今亦無二法

惟俗士不務通經學古務媚時人眼而媚時者往往
得意去於是好古者輒變以殉人如商君于秦三說
而巧合嗟乎文之破壞甚矣孝若負異才自舞象時
卽能作魏晉人詩而下筆爲文已不凡冉冉至今亦
漸種種矣於詩古文竟擅作者之場而於應試今文
亦頗揣時人意爲鮮色埤詞乃微言正法卽古文之
體若松青筠綠濤風霜而出如鍾王書不問大小皆
可模也孝若亦云古今文無二法蓋悟後語耳然乙
卯之役已遇矣而復落命也於文何損孝若耐之卽

云種種比公孫子貢禹輩不尚少年乎

吳伯霖稿序

伯霖妙才過余而以臭味謬推余四方推執文之長
及伯霖亦謬而及余然余技止矣而伯霖日進往謂
伯霖文如傾國佳人直以致勝今不幸伏幽憂之中
棲息聖水遲伯霖一第顧發憤索羣書而討之湛深
其思而紆之篇以授方內學者其譚理如尊宿登壇
名言屑玉而尊宿無其秀其鑪錘古人而挽強於一
句徵巧於一字如發劍才士而才士無其深乃知文

章之妙而良工之苦干將莫邪出而水陸斷風雨至而當其躍身冶中不避陰陽之患而取精以出者世人不見也嗟乎此豈可與偏材小生卮言游辭以博名高者同年語哉雖然宇宙事廣矣文章之士精用之而有道者以爲枝葉吾願與伯霖閉戶而下其鍵相守於無名之樸可也

單發之制義小序

單生發之以麟經冠關西第五人名甚盛已未上公車偶蹶不快意時余以祝釐入長安而發之冲然過

余低首屈一座且云生平於余有嗜痂之僻願相與商略余覩發之貌偉長而落穆非凡士也披其文理則如開門洞見氣則如決河下注語則如飛箭迅發廢千人而破萬里者何以蹶也雖然文章之道無盡人之才亦尺有所短發之無自爲量請證之精微以詣其室行之曲折以翻其瀾益之風藻以吐其華第五之名不足爲發之雄三年之後吾當占子以杜德機其爲木鷄也其神龍也吾道且西矣

王岷生三言小序

楚王岷生別余三年餘頃在廬居而挾所刻陳言憂
言授言曰三言者索余題而序之余展覽其略三言
一言也謝疊山論文有小心文放膽文心無大小而
小之則針芥微茫皆足以爲囿至於膽則浩瀚奮決
無所不可極書生爲文臨戰而虞勝負未陣而亂非
譽制於人而不能制人膽怯耳吾觀岷生落筆無之
非膽題亾問短長亾問理學亾問花草律度而橫膽
而出灑然成篇篇幾千言譬之江河怒濤排山震嶽
又譬之鉅鹿之戰以一當百呼聲動天地泥水之陳

草木風鶴無非兵氣足以奪百萬之鬼而制其命斯亦楚之雄師悍將天下其孰能難焉雖然膽有所使亦虞有所挫夫風恬浪靜則不怒樽俎折衝則不戰斯天下之要言妙道也此生其諦聽之

香樹林文小序

余自維拙樸亾奇而門人中多負奇者如陳生則梁唐生宜之特甚陳生乃盛推梅里之錢彥林而宜之亦序其文橫行長安然二生皆歷落不偶人也夫世之亾奇而偶於時者多矣彥林寧不偶不能不奇余

覽其香樹林之文蓋畫然有所據於中而恢然肆乎其外精英之所出從不頓地而芴無人且恥夫世之慧人蹈輕襲虛徼一時之利而獨處其實者任其重且遠者以甘爲鈍而號天下之愚人至以文章之技而比於禹之治水周公之居東其自許不亦甚奇矣哉老子云不笑之不足以爲道昌黎子亦言余爲文小稱意則人必小恠之大稱意則人必大恠之矣夫笑與恠庸人之所避也而古之人甘焉以自信其必傳此可以知彥林矣

沈無回十八房文定序

余偶閱墨選行於世余實不自愜意謂未足盡人之
美而人謬信而傳之於是以十八房稿請閱者踵至
然塵勞作苦心自有窮卷帙浩繁覽不及竟而坊刻
肆出玄黃襍陳又有贗託姓字者余心不無枝癢無
奈日之不給也一日過友人沈無回山齋乃得其所
評文定者覽之爽然若自獲其心目而與之共臨水
鏡余心始歇而坊刻亦幾乎駢拇矣又問無回何以
作定法無回曰據吾之眼行吾之意是諸作者有高

奇有夷暢有短而雋有長而博皆吾愛所不能割吾
眼所不入而心所痛絕者俗之一字而已快哉此論
是余所爲爽然而獲者也雖然人之多方而文之流
俗也搖搖乎以敗絮落葉衝風波之間其誰與定之
秦越人見垣知卽日生死吳公子聞樂并後世存亾
而知之物有所起有所止吾學有所以定於文之先
者不可以告人矣無回以爲然請書此語弁其首與
海內共證之

白社草序

自來經書稅與策論不同體先輩於此循題立格不
越繩尺而近世高才輩出變化無窮不復可以此概
量天下然令弱才眇識爲之文未成調而去題已遠
夫惟負奇博古之傑能盡變於所不同而歸於同如
吾同年軫南張公所攜郎君與諸社友白社草是也
諸君之才旣受異於天而胸中所苞羅探扶能獨闢
戶牖往往緣題起意駕乎題之上而不爲題縛緣意
命格超乎格之表而不爲格囿翔寥廓而標英靈豈
繩趨尺步之流所能望涯而至哉夫款段下駟百里

而蹶十駕不及而穆王之駿馳千里遊西極鸞鴻決
起槍榆不至而控於地騰之怒飛激水三千搏風九
萬以此而當諸君之文又何讓焉余故序而歸之非
敢毀繩削墨爲中庸之人誤也

萬孟暘近義序

往余令鍾陵於童子試時才孟暘而拔之相別廿餘
年孟暘成進士相見款款凡余所歎賞與稍有商略
語孟暘俱能誦述無遺自言於先生踪跡闊疎而心
神之契合筆研所揣摩千里一席也三復其所製義

淵然其思稜然其骨畫然其力潑潑然其機穎一切
理套俗豔與奇詭之談絕不涉其筆端以爲似之有
余想所不及以爲弗似而孟暘之爲余亦自現其座
師錢太史亦云萬生之文有貞父也妙哉神劔之合
雌雄而清音之諧山水乎孟暘謝庶常之選亦屈首
爲令笑語之曰爲令切勿似余落落人後而偃室所
造名下士又或有似孟暘者出此爲大快耳

沈無回近義序

吾友無回才高而意朗所負肝膽學術往來千古人

不可一世天下事逢所欲言吐露不諱絕無依傍回
互之氣其爲文如是也夫蘇門之嘯聲振窮谷梁甫
之吟悲慨末運古之人精英所寄託而凡夫俗耳聞
之不解若刁調之過而鐘鼓之駭今人閱無回文有
憂憂乎不相入者如是也無回凡四上公車報罷而
不悔吾輩亦相勸堅無回之意必毋悔世有阮嗣宗
司馬德操其人何愁僂響不傳人間壯吟不作宏業
哉獲薪草所刻深秀高亮足以徵無回筆墨之表矣
嗟乎小東歌獲薪而令文人歎積薪則世眼所青黃

者當其咎無回不受也

呂爾搏易義小序

范師爲易大宗進門士十有九人各有所撰著不盡見而於閩見張子環呂爾搏子環之於易也深而用其奇於理無所不詣而悍勁有餘若挽强弩奮長戟而奪千軍之陣爾搏凝靜自天性而筆無虛發其精而不可移也雕龍也喻馬也其整而不可亂也周條侯之細柳而程將軍之刁斗也某居嘗謂聖人係辭以盡言不知所欲盡者何在而未世文士且濫用之

以獵於名場昔也病腐而今也病詭病浮病放矣望
存什一於千百令如爾搏精整而肅典常與子環之
深勁並承師門世卽不乏文士何敢越閫而稱與易
功臣矣

方晦伯四明門人稿序

四明枕山而襟海其巖崑磊奇之槩與震蕩浩瀚之
氣鬱淳而爲人文其爲詩古文往往多名家卓絕當
代而先輩應制之文其恢奇淹博亦有可得而傳迨
乎末流庸庸者拾殘瀋剝馥以爲雋而小才浮藻相

率爲倣詭輕佻之習而不自覺郡邑大夫賦訟之爲
役而刀筆筐篋之不給或亦好畫龍而持建鼓其誰
與正之汝南方晦伯先生來守四明治理餘暇闔郡
之子弟日課而月程之篇爲之摘而句爲之摹今覽
其所彙門人稿大都令人人盡吐其故而納其新若
煥旌旗而變營壘也標重以爲質而挾精以爲華若
鑄九鼎而索層嶽也若百鍊之金而五色之石也理
所必有者出之心所獨喻者嘔之若剖璞於懷探珠
於頷而山珍海錯無所不獻也始昌黎所云取之心

而注之手憂憂乎陳言之務去者過此以往追渾灑
而詣神化與古之作者掩映千載又何徑庭焉然則
四明之士輩出而登稅文之壇者當不乏而晦伯所
以陶冶之者豈其微哉夫俗吏驚名法迂教化而漢
列循良必以文翁爲首吳公所舉士止洛陽賈誼一
人耳而稱治平第一何也則晦伯可知已

見後齋近草序

壬子余寄官畱都延陵張生葵與其仲蕙以母氏墓
中之石來乞銘其容深墨其言嗚咽而有餘痛余敬

之曰此情至之人必能文者也已而抱文以贄且泣然泣曰此母氏之教也於是覽其文沈沈乎其入之深也顯乎其侗也創之而有奇也放之而成也余曰此非其文之云也張生有據於中而爲之言哀樂不貸於人執則痼矣疏則達矣知其然而然與不知其然自情至者也椎輪之爲輅積水之爲冰素絲之爲組繪其皆以情基者與張生兄弟三人伯且隱而不爲文仲能文而讓諸其弟是葵也亦直以文自見而嗚嗚然歸德於母其文也其舉魚之淚歟又兩年生

且禪彈之而成聲乃猶抱其近草乞余序余喜而序之其文卽不盡能至然有其至者矣非無情者也生名育葵字午卿

孫子齋稿序

文之必以法猶匠氏之必以規矩然而庸者局之所法非法薰習成俗猶窶之人見甕牖不見天地而高才之士又破法而逃之狂象逸猿駭不存之地去面目而索其人人亾有也吾蓋讀子齋文而異之吾以法求子齋子齋弗繫也以心取識以識取意以意取

篇而詞傳焉其入於微者遠而致乎力者鉅俗士之所膠子嗇之所去也吾以非法求子嗇而子嗇之意之力之所至相剝相擊相虛實散合率其中所欲出畫然古之制也古之制子嗇之匠也子嗇行而司理吾郡郡之才未必遜十室而習氣沉人非法之法與破法之法恣行久矣得子嗇文讀之將破俗而呈爲法求諸意之匠古之制其猶方矩圓規乎子曰道之以德齊之以禮禮者理也節文之之謂也有恥且格以爲齊民首舍文安之吾以是觀子嗇矣

傅子京制義小序

子京原名元範今名冠

傅生子京自髻髻時余得選鍾陵里中士而識之子京名家子而負雋異不屑爲里人語於文清迅快利游筆皆解也稍慕爲結束簡貴之篇余笑語之曰長戟而銳短兵而悍皆勝具也鶴頸而斷鳧頸而續以人傷天悲也子京額之去遂操筆踞勝丙午得雋第二人而陳生仲容居第三夫陳生吾虞其才縱而泛駕子京吾虞其思約而窘幅而二生俱善用其短長以橫行江表百里而比肩鍾陵之獲有聲於三楚非

二子之以哉上公車二子又俱北過而別余余復笑語之曰兩生各負所短長而無斷續之患勝具自在也進而古之人通道妙理以忘所服又孰能畫之於是子京檢舊所作文請余題而刻之曰元範願使世之人盡攻吾短而吾所長乃見

志遠齋會課序

今日之文自庸謗腐爛至駭奇喜僻之士莫不有套試取其所習用者而驟禁之將人人自廢矣而解之者曰此時也夫趨時莫如易周流六虛未聞膠膠焉

縛而不脫也貨殖者窺時之所必窮而預爲之算故
曰爭時若鷺鳥之發有如人棄亦棄人取亦取吾見
其終身負擔不休耳時賢之作何以異是夫秋霖夏
潦蛙蚓雜鳴當是時使朝暾杲杲有不體輕而色笑
者哉吾門人周京夫近之京夫乙卯戰罷以來日與
其同心友六七人下帷精討余近覽其文數篇能以
湛深之思寫粹精之理寧刻而入毋豔而浮杲杲日
出天朗氣清非復時賢氣象然則善爭時者舍我京
夫其誰哉六七君子之文雖不盡見不知其人視其

友始必力掃庸謗而并絕惟奇之習如我京夫無疑矣余故喜而序之

庚戌十門人稿選序

余不佞道術浮淺非有洙泗典刑河汾風範而謬以文章之僻所至得士庚戌榜所嘗從問字者凡十人其人兩吳荆楚西江東魯不同域也其文遠者十餘年近者數月而楚有朱子上以書問代比而文字往來無虛歲不接膝而情彌親則猶行古之道也其文短長廣約奇正正奇不同調各著於篇而吾壹以吾

眼行乎十君之尺幅間則十君所以稟先民之程而
擅國能者大較覩矣雖然十君亦何必以余之選重
也夫亦曰末世師道之不立其弟子所學習具以浮
文相高聲名相援引其附也如籛其畔而去也如徙
乃浮淺若余所居林壑而十君名成矣偶以一日之
知直從長安寄吾文余亦僭定其文以程於當世亦
謬相稱許庶幾乎河汾之流風吾輩所尚可知已夫
以余之僭成十君之高寧文也與哉

西湖課稅序

今之君子入官致用莫不願爲令何者以其親民也
然而於士不必親親士矣於文不必親蓋其精氣紛
於應接耳目亂於案牘欲親之而固已疎矣异哉致
虛樊公之爲邑也余託公好閒一過見公於他客有
然有不然而於士若加諸膝他事有不可卽不難片
言決而論文譚道卽津津乎不去口或挑燈據座或
退食散衙吮筆潑墨非詞人賦草卽諸生稅文披若
鏡光斷如獄案公非獨親士夫亦有所自親耳矣言
偃之愛人本原學道公孫僑之教子弟溢於博物公

其似之乎凡公所品題皆佳士士號能文者以不及
出公門爲恥茲編可知也余不佞兩年湖濱四方之
士亦有抱文過質者余酬答亦未有倦然以煙霞開
身饒爲之以方吾致虛劇中出服當爲之矍然避席
矣

重刻二仲制義序

二仲者鍾陵陳仲來李仲章也余爲鍾陵長時仲來
方弱冠已俊爽絕倫如汗血之馬仲章猶髮覆着冷
泠出片語如清泉之墮危峰峭壁下也嗣是時時寄

余所作蓋絕塵而奔浩浩蕩蕩無際涯矣二仲今日乃始齊驅並駕幾使天下繩墨之人驚怖其言而奇服者辟易而不敢當然世之嚴繩墨之論者無如余而文之真奇者彼自有無方之方不行之行無師之師如出空之雲倒峽之泉其形模勢至不可圍不可狀而必有所歸受世之人未見也而不可以爲訓不可以訓者彼有所天授而此學步彼陶鑄於古之人而此猶在繩樞甕牖間也以是而觀二仲之文其必名於世而亦必自今日始齊驅並駕而世猶兢兢然

驚之何疑乎善乎舒先生之評仲來曰奇而正正而大其評仲章曰朗韻清機如曙星之導旭日清淮之貫長河然則歸不於正源不於清卽奇焉浪花蕩子焉而已余以是告世之奇人能觀二仲文者而毋以耳食誤哉

丙辰房稿選序

今日制舉之文求如先輩之爾雅渾厚不易復矣清深雄秀亦不多矣簡淡平夷益復少矣余之爲此選也有三種上出蒼天下入黃泉題旨不相蓋而意無

近習者一種也鎔鑄古人之書掀翻才人之調憂憂
乎陳言之去者一種也卽清而不必深秀而不必法
者一種也辟之五行之取偏殺相法之取古恠時之
所爲使人固無如何也吾所深厭有四惡曰俗套曰
杜撰曰畔理曰裂法非惟不文也且爲文作備焉總
謂之劣而已士遇合有幸不幸文之乘時良未可定
而理則理法則法君子行法以俟命已矣夫古之名
將未有浪戰而勝者也韓信李廣亦自有法諸君不
譽耳

聶侯校士錄序

昔宓子賤不下堂而單父治記所友事者若而人不
知其所爲奚若子游絃歌武城所得人一非公不
至之子羽已耳當是時無文字之習與抱質私謁之
禮古人所尚可知已而未流不然士子以文爲徑已
向其爲利邑大夫以興才好文爲市而縣之應玄黃
之觀未洞而上下相矜飾以幾於古人不亦遠乎乃
純中聶侯之羣諸生而課之稅也亦猶行古之道也
錢塘五衢三劇之衝車馬如鶩案牘如壘上下紛應

不啻行山陰道中裋帷汗雨不休也而純中於諸生
月不廢課課不廢校校不廢品臧否否臧鼓舞其名
心而折衷之於道諸生無問所臧否各厭其意去亾
敢以他狎者今其文具在或研思而沈或抱才而揚
畫然石立飄然雲飛汨汨然而泉涌爲品不同其爲
才之所適而純中精神之所交應一也豈其爲名而
名焉往當世賢者從文學而窺古治理庶幾於單父
絃誦之意無相飾有相生其茲編也夫

鍾山集序

今夫焦尾之桐非中郎不賞崩岸之鼓非茂先不解
常人習於所見學者溺於所聞況夫世之經生家識
迷訓詁心搖得失眼障玄黃而賈人以文爲市又秦
火所不能燼當爾時欲探幽奇要渺之致總浩蕩之
言標繩墨之格非好學深思高才夙慧者不能而世
有幾人吾自束髮降心此道今種種矣其先輩典刑
後來雋異所目挑心賞不爲不多亦未遂居蔡張之
後乃門人唐宐之卓左車所彙鍾山一編上下二百
餘年原本千餘首而得之爲六百分之爲五集不特

世眼所希見其爲吾心目之所未歷者亦什之二三
抑何其鉅麗而特奇也吾師不云乎斯焉取斯兩生
負才故絕倫而年來以鑿枘時人退而居巉巖幽壑
之中非奇文不賞非微言不投爲此選也如唐詩品
彙十二家之外有極玄國秀英靈之集其中有所獨
至非苟而已也覽者慎勿易視之兩生近所居鍾山
深處遂以名篇

癸丑門人稿選序

昔在庚戌門士中第者十人今僅得五此五君者遇

合淹速不同時而均以文章結余知章生余庚子所
舉士也陳生金生問字壇石者也西湖經席乃得同
郎白門講帷始來方子前喁後于翩翩一時世若以
五君重余而五君所以重於世則何必盡近具也雖
然爲才士前導爲吾破寥寂五君之文亦不可以無
刻五月得其所寄各若干首遂選付梓人安有評隲
附於盍各之義

易準序

往余與門人輩說經譚道接塵論文慮無虛晷而獨

玄父周旋最長其人靈骨玄心渾中朴外諸人望之
蔑如也而諸人之業亦無能爲右今夏得其所選易
義一一皆準於法其爲余所已歷者七所未經者三
煥若神明頓還舊觀玄父其有深心哉夫文之有準
猶奕之有譜匠之有繩而射之有鵠也不按則不名
爲工不游神不名爲化夫有神化而廢準者矣未有
廢準而神化者也余敢謂習者之門而令天下盡失
智巧哉老僧以毀戒印宗法吏以破案舞律余與玄
父將不免多事之誚所甘心焉矣

清音篇小序

左太冲招隱詩何必絲與竹山水有清音獨昭明解其語昭明死此語沉五濁世中矣余嘗戲論令昭明不在山水間其音安往余於靈鷲山阿之小閣題曰清音亦名其似也子在齊聞韶三月不知肉味其所知者韶邪非韶邪暇日偶與二三了酬此義不可了會素業二編成刻者併索余近草先之卽以清音題篇聊付之山水而已

近稿自序

黃汝亨曰孔子有言神也者妙萬物而爲言者也惟心之謂與夫文者心之精微也心通於神神動於氣氣發於聲故精微出而文章以成可以鏤塵吹息質往俟來父不能傳之子而凡可以證於聖聖人復起不能更易故曰辭達而已凡辭聖賢所以傳神者也學庸論孟皆是也聰明之士以爲穢業而略焉不且挾才摹古意相擬測其言愈高而去神愈遠況乎緣飾聲色以爲工而其流也并其工而離之嚶然以爲大雅者在茲乎汝亨每以是旨自按其舊所爲稿在

秋水編者三得之在寓庸集者五得之然世之所不
貴於寓庸者甚於秋水也又安知嗣是而得者之不
爲失乎夫神明之道精微之域苟得焉可以死不恨
吾懼夫失以爲得而祇以戾於世也檢之笥中得近
稿二十首以煩匠氏而取證焉昔在戊子孟冬之月

西江巨觀錄序

代

居嘗覽賈生政事書慨然太息謂移風易俗使天下
回心而鄉道類非俗吏之所能爲心竊怪之夫吏束
身奉三尺守文亾害而斤斤乎刀筆筐篋可謂曰能

而題之以俗斯不亦少年狂論哉已而深維之人非
生而吏也吏亦非生而受之俗俗者道之反也試則
吏不試則士吏習士士習文蓋有所漸靡非一日而
然積水層冰變而加厲而水不與夫當其士有吏之
質當其文有士之質當其道有文之質失道而後俗
俗以靡士士以靡文言乎含章不成服施於當世之
務猶石裏華積而無可貴於用醇疵之化於是焉作
而後歎賈生所慨然而太息者未爲過也大江以西
有道之鄉弘文砥節拔俗之彥往往而出某亾狀不

自意奉 上旨按茲郡國吏問俗美惡而布廣善學
官之功令山川所歷以觀人文間嘗遣十三郡諸生
之雋而衡校之而瞿然還顧於太息之譚以爲察吏
於士自今日俗士而襲陳言媮有司必俗吏而務刀
筆筐篋與其佞俗而得也寧迂道而失三覆三射以
覈於有司而取量於徑寸不敢以故事應也浮者汰
蕪者汰冗長者汰虛憍而放浪者汰淺而飾之艱庸
而獵竺乾柱下之似以爲玄妙者汰本於性暢於情
各極其才之所至上稟六藝下綜百家短長不同體

奇正不同變淺深不同致繁簡清濁不同調要歸於道綦質質成文文成用俾天下無俗士之目而已合而題之曰巨觀而觀止矣嗟乎人生而俛首牖下游闕闕不知丘壑之美一丘一壑勝矣烏知夫西鄉望而有匡廬五老之崔嵬幽絕與九江彭蠡洸洋莽蕩浩渺之概又烏知夫五嶽十洲瀛海三神山之屬天下之觀焉有極也

兩浙觀風錄序

代

三代養士之法設爲庠序學校而訓之以德藝申之

以孝弟含醇渙藻耀於休明後世不然自制策而遽
變爲經義之選重在乎科名其文之至者固亦可以
通道而浮者特爲比偶色澤之工以媚有司非靈心
有殊而至道闊遠不可致上所觀下所習漸靡使然
也 朝廷憂之令督學使者歲一校士擇京朝官博
雅負物望者與試事總總乎文體經術之爲訓而未
也御史奉 上命巡行郡國察郡吏安氓庶而亦委
以興賢育才之事所至得校士品稅而觀風行焉非
以爲文而已夫亦曰士者四民之首而他日良吏所

年才集 卷之二 五十一
繇顯文固士之先資而靈心呈初於世變俗流大有
竅繫云爾浙山川韶秀鬱爲人文薄海不敢望余不
佞樸遯少文奉 上寵靈亦得以巡方之役所至下
有司試諸士文次第以上而因爲一澄覽焉所云至
而通予道者有之未易一二言大較以氣之靈隨方
域所習漸靡爲文浙以東其士剛其文英傑而浩衍
若大江之流而失也草野而椎鄙浙以西其土柔其
文深秀而逸俊若卿雲之燦而失也佞巧而浮涉相
輔以行而折衷之於道皆國器也浙人文冠冕海內

而溼溼乎大國之風足以觀矣抑余因是而證其旨
於易夫易之巽風也其性爲入入而後說之爲兌爲
朋友之講習說而散之行乎水上則渙爲沿迴曲折
波瀾蕩漾稱天下之至文然則六經之爲文固未有
無所入以爲說而能渙以散之者也入乎道則醇入
乎才情則雅入乎詞藻聲華則麗而駁而他日之人
品功業徵是矣故曰下之所習上之所觀也易亦有
之風行地上曰觀而其行乎水曰渙觀以觀其所渙
者也故先王以省方觀民設教神道設教而天下服

矣余卽樸遯少文不敢謂古者岸序學校所以爲觀之具盡屬於此然教先士士先文舍是將何觀焉因錄之與諸士爲質士誠絲之以講習端所從入舉末世而三代之勿謂非此具也

素業四編序

山居無事自品置泉石酬應朋從而外惟是漱蕤論文爲帶來宿疾二三子亦謬而尊予予亦不自避匿謂文章之權冷蘊所私世人之所不爭凡三年集四方之士計得文如千首仍名曰素業而次之爲四編

以授梓人客有愛予者曰子是繙可無出先是酉戌
諸卷之刻嗜文者或奉之爲祭酒而薦紳家不以爲
噉名則以爲旁亾人且坊刻之託子以贗真者俱坐
子以不赦予笑應之曰文非爭器也惟名自外來卽
欲求爲尋常無聞之人而不可得庶幾從文以核名
從博學明道者以核文稍有不與俗同而紹先民之
法以存聖賢旨歸之百一予亦幸可以無罪矣乃若
出而垂名竹帛處而勒徵言爲各山之藏此非予今
日所及以讓當世之銳心不朽者

易義分編序

易義無方而商瞿而下伊洛以來經不一門吾友張維誠精研名理尤深於易嘗涉歷百氏解而以理象數三家詮證所指隨以所指緒餘涉歷制舉義千有餘篇而分之爲三曰奇編曰新編曰廣編而文備矣義悉矣道妙之精變心靈之苞符人代之高華若挹潤於河采寶於山汪洋陸離何所不有然猶記余幼冠時所酷嗜無如易明文品彙與統粹二編自歸崑山董會稽而外遠如施璉川諸理齋孫正峰沈青霞

近如陳霽巖許見魯方衆甫輩或大帥獨登或銳師
偏指皆昭晰羣品鼓吹一時今已淪落散佚千百而
什一向微維誠斯編出則魯靈光無存餘羊不供不
知此後浩浩蕩蕩何底止也雖然道一而已正出奇
故催新約致廣文寧有紀從無紀窺一從文窺道從
制舉義窺文學者因以知代因以知維誠可矣維誠
有子曰堯則有倩曰陸生位時俱俊穎絕倫共訂一
室疑於老泉之有子瞻晦翁之有仲默它日不止以
斯編嚆矢稊林而已

羅玄父稿選序

余廿餘年來及門之士獨玄父周旋久海內人始猶以余知玄父而後乃以玄父知余玄父自謂師予而予之心師玄父世不知也然予既得玄父而道若尊而言若徵卽及門之士藉玄父靈液玄津以冲舉者無限而玄父獨艱于一第屈原天問之作尼父命也之嘆豈不悲哉乃玄父制義具在正者可以翼六經徵者可以苴二氏不令人驚喜者如衣布茹粟才士所不遜而令人推遠者則似腐之神理似恣之力量

湛一真而揮八極章句之儒所不解也昔之才子如
邵比虞桂北海輩至今猶傳頌其文而魏文靖陳檢
討且抗聲名臣之列嗟玄父詎以一時科名定千古
哉然則玄父所重有在而卽稗文以論玄父則如此

墨史小序

劉穆之言書雖小事宣被四遠結繩而後草玄圖妙
不可謂非墨卿之黜然心之精微口不能言墨卿卽
有勲伐當其詣微孔靜幽渺亦烏能自宣其致具代
有汗隆製有因創品有俗雅烏得而無史史筆自馬

遷其爲紀表世家列傳甚具後代閱世觀變者亡以
加尚方氏立卿準之作墨史稱玄圃之龍門若伯倫
頌酒桮憚品棊昌黎傳穎天生神物託于人行於世
斯亦千古翰墨得失之林也然史載墨卿適韋仲將
李廷珪而下逮乎邵方汪程精而燦者出新都居多
而韋李舊物烟銷水沉與其人邈矣難接或戲石昌
言子不磨墨墨將磨子寧無發達者一概然則存而
不磨爲墨卿立功者惟史而已

鷺湖草序

往予視學江右舉指意格三言與諸生論文衆以爲
然而臨筆落紙時有不盡然者非不然也未流蕩人
而曲士拘而多畏其高濶自喜者委轡泛駕未肯俯
首羈縲之內操必然之論而強之合是爲難耳獨試
鉛山生得李倩玉文而快心賞之彼其才固天授胸
中空明若鎔羣書之液而契三言之妙嘗題其牘曰
有見解而非渺有膽魄而不浪有機械而不能蓋能
然而非使之然幾乎養由基之射秦豆氏之御矣辛
酉遂舉於鄉第一人而典試者爲周玉繩中允玉繩

嘗從予問業西湖之上昨自江右還語及李生相視
大笑乃知文章有神其契合如此而有然有不然者
非文之至也頃倩玉刻鴛湖草還而問序於予予亦
安能舍夙昔所許而稱引之抑聞之昔者楊文襄督
學秦中稱李獻吉爲冠獻吉舉第一人而卒以古文
辭卓絕當代其氣節亦嶽嶽古人則予所期於倩玉
豈僅以制舉藝冠一時已也

墨卷選序

文章之理萬世不能易惟是氣格與時升降中人後

時以趨智者先之而當其時拔幟標勝以移世俗之
觀者亾如中式之墨顧其中稱合作者亦無幾人其
淳澆高卑作者不能自定也太史湯嘉賓張世調兩
先生登壇自命爲世導師其於歷科諸墨擇其佳者
篇爲之評句爲之摘如堪輿家之指山川起伏迴合
瞭然在目而予亦嘗爲二三子酬對不能默然自宣
德至萬曆之卯辰多所品騰附于老馬之識途然二
公有奇賞而予稍嚴於格又如老吏覆案不害其爲
大同也吳生采于讀書湖上研心此道乃彙兩太史

所評合以予評而槩題之曰三先生墨選參而伍之
心理相準於時徵變於文徵巧其亦可以無遜情矣
豪傑命世之士於此諒有獨觀而趨時者亦不能廢
局而賄勝若夫末學狂生恣冒臆而箴典刑以俸其
技之一售吾末如之何也已

寓林集卷之七終